

摛藻堂四庫全書薈要

史部

欽定四庫全書會要

史部

通志卷一百四十六

詳校官員外郎臣楊世綸



欽定四庫全書會要卷九十六十三

史部

通志卷一百四十六

宋右廸功郎鄭樵漁仲撰

傳第五十九

後魏

衛操

莫含

孫雲題

劉庫仁

弟頭眷

庫仁子顯

頭眷子羅辰

羅辰玄

玄子觀

孫仁之

乞歸

仁之伯父

乞歸子嵩

尉古真

弟諾

諾子眷

眷子多侯

多侯弟子

子觀

慶賓

眷弟地千

穆崇

崇玄子壽

穆崇

玄孫泰

泰崇子觀

觀

古真族

玄孫亮

亮子紹

崇曾

孫弼

崇子頤

奚斤

叔孫建

子

安同

子屈

弟原

弟頤

原庚業延

王建

羅結

子

妻伏連大

子大拔

大拔孫寶

問大肥

奚牧

和跋

莫題

賀狄干

李栗

奚眷

燕鳳

許謙

崔宏

宏子浩

崔寬

宏弟

徽

衛子敬

張袞

孫白澤

鄧淵

子

長孫嵩

從子道

生

道

葉生

孫觀

觀子承

長孫肥

翰于栗磾

拔子洛

拔子烈

洛

子忠烈弟勁

忠弟景

崔逞

子頤

逞元孫休

休

從子愍

愍宗人模

烈

子偉

憲子嶷

封懿

子元之

回族

叔軌

軌子偉

子

子

子

子

衛操字德元代人也少通俠有才略晉征北將軍衛瓘
以操為牙門將當神元時頗自結附及神元崩後與從
子雄及其宗室鄉親姬澹等數十人同來歸國說桓穆
二帝招納晉人於是晉人附者稍衆桓帝嘉之以為輔
國任以國事及劉石之亂勸桓帝匡助晉氏司馬騰聞
而喜之表加將號稍遷至右將軍封定襄侯桓帝崩後
操立碑於大邦城南以頌功德云魏軒轅之苗裔言桓
穆二帝統國御衆威禁大行國無姦盜路有頌聲威武

所向下無交兵招喻六狄咸來歸誠奉承晉皇扞禦邊疆王室多難天網弛綱豪心遠濟靡離其殃歲剪逆命姦盜豺狼永安元年歲次甲子姦黨猶逆東西狼跡敢逼天王兵甲屢起怙衆肆暴虐用將士鄴洛構隙棄親求疎乃招異類屠各匈奴交刃千里長蛇塞塗晉道應天言展良謨使持節平北將軍并州刺史護匈奴中郎將東羸公司馬騰才神絕世規略超遠欲求外救朝臣莫應簡賢選士命茲良使遣參軍壺倫牙門中行嘉義

陽亭侯衛謨協義亭侯衛鞬等馳奉檄書至晉陽城又稱桓穆二帝心存宸極輔相二衛對揚毗翼操展文謀雄奮武烈承命會議諮詢奮發翼衛內外鎮靜四方志在竭力奉戴天王忠恕用命外勲亦攘功濟方州勲烈光延升平之日效貢充藩馮瞻鑾蓋步趾三川有德無祿大命不延年三十九以永興三年六月二十四日寢疾薨殂背棄華殿雲中名都國失惠主哀感歔欷悲痛煩冤載呼載號遠近親軌奔赴梓廬仰訴造化痛延悲

夫時晉光熙元年也皇興初雍州別駕鴈門段崇於大
邦掘得此碑文雖非麗事宜載焉故略附於傳操以穆
帝三年卒始操所與宗室鄉親入國者衛勲安樂亭侯
衛崇衛清並都亭侯衛琰段繁並信義將軍都鄉侯王
發建武將軍都亭侯范班折衝將軍廣武亭侯賈慶建
武將軍上洛亭侯賈循都亭侯李壹關中侯郭乳關內
侯皆為桓帝所表授也六修之難存者多隨劉琨任子
遵南奔衛雄姬澹莫含等名皆見碑雄字世遠澹字世

雅並勇健多計桓帝並以為將常隨征伐雄稍遷至左
將軍雲中侯澹亦以勇績著名桓帝末至信義將軍樓
煥侯穆帝初並見委任衛操卒後俱為左右輔相六修
之逆國內大亂雄澹並為羣情所附乃與劉遵率烏丸
晉人數萬而叛刺史聞之大悅如平城撫納之欲因以
滅石勒後為勒將所害

莫含鴈門繁峙人也家世貨殖貲累鉅萬劉琨為并州
辟為從事含居近塞常往來國中穆帝愛其才器及為

代王備置官屬求含於琨琨遣含入國含心不願琨喻之乃入代參國官甚為穆帝所重常參軍國大議卒於左將軍關中侯其故宅在桑乾川南世稱莫含壁含音訛或謂之莫回城云子顯昭成世為左常侍顯子題道武初為大將以功賜爵東宛侯常與李栗侍宴栗坐不敬獲罪題亦被黜為濟陽太守後道武欲廣宮室規度平城四方數十里將模鄴洛長安之都運材數百萬根以題機巧徵令監之召入與論興造之制題久侍頗怠

賜死題弟雲好學善射道武時嘗典選曹賜爵安德侯遷執金吾參軍國謀議太武尅赫連昌詔雲與常山王素留鎮統萬進爵安定公雲撫慰新舊皆得其所卒謚敬公

劉庫仁字沒根獨孤部人劉虎之宗也少豪俠有智略母平文皇帝之女昭成皇帝復以宗女妻之為南部大人始建國三十九年皇子寔君弑逆昭成暴崩道武時年六歲秦苻堅伐亂遂取其國乃以庫仁為陵江將軍

關內侯令與衛辰分國部衆而統之自河以西屬衛辰
自河以東屬庫仁於是獻明皇后攜道武及衛秦二王
自賀蘭部來依庫仁庫仁盡忠奉事不以廢興易節庫
仁又竭誠事堅故堅以為廣武將軍給幢麾鼓蓋儀比
諸侯衛辰恥在庫仁之下殺堅五原太守而叛庫仁破
之追至陰山西北千餘里獲其妻子盡收其衆及畜產
徙其部落置之桑乾川苻堅賜庫仁妻公孫氏厚其資
送加庫仁振威將軍後慕容垂圍苻丕於鄴又遣將平

規攻堅幽州刺史王永于薊庫仁遣妻兄公孫希率騎
三千人助永擊規大破之坑規降卒五千餘人乘勝長
驅進據唐城與垂子麟相持庫仁聞希破規復將大舉
以救不發鴈門上谷代郡兵次於繁畤先是慕容文等
當徙長安遁依庫仁部常思東歸是役也文等夜率三
郡人攻庫仁庫仁匿於馬廐文執而殺之乘其駿馬奔
慕容垂公孫希聞亂走丁零庫仁弟頭眷繼攝事頭眷
第二子羅辰有智謀謂眷曰此來行兵所向無敵心腹

之疾願早圖之眷曰誰也對曰從兄顯忍人也為亂非
旦則夕耳眷不以為意顯果殺眷代立顯庫仁子也顯
既殺眷又謀逆及道武即位討顯於馬邑追至彌澤大
破之後奔慕容麟麟徙之中山羅辰即宣穆皇后兄也
顯既殺眷羅辰遂奔道武顯恃彊每欲謀逆羅辰輒先
聞奏拜南部大人從平中原以軍功賜爵永安公除征
東將軍定州刺史卒謚曰敬子殊暉襲爵位并州刺史
卒子求引位武衛將軍卒謚曰貞子僉頭位魏昌瘦陶

二縣令贈鉅鹿太守子仁之字山靜少有操尚粗涉書
史厯位衛將軍西兗州刺史在州有當時之譽武定二
年卒贈衛大將軍吏部尚書青州刺史謚曰敬仁之外
示長者內多矯詐其對賓客破牀弊席麤飯冷菜衣服
故惡乃過逼下善候當塗能為詭激每於稠人廣衆中
或撾一姦吏或縱一孤貧大言自眩淺識者皆稱其美
公能之譽動過其實性又酷虐齊神武在晉陽曾營城
雉仁之統監作役以小稽緩遂杖前殷州刺史裴瑗并

州刺史王綽神武大加譴責性好文字吏書失體便加鞭撻言韻微訛亦見捶楚吏人以此苦之而愛好文史敬重人流與齊帥馮元興交欵元興死後積年仁之營視其家常出隆厚時人以此尚之仁之伯父乞歸太平真君中除中散大夫性寬和與物無競未嘗言人善惡曾遇患晝寢有奴偷竊乞歸詐睡不見亦不泄之此奴走入蠶蠶方笑言之亦無嗔色獻文末除主客尚書孝文初位東雍州刺史賜爵永安侯卒子嵩字阿龍好周

人之急與王仲興自平城被追赴洛仲興家貧不能自達嵩事事資遣宣武時仲興寵幸乃奏除給事請疏黃河以通船漕授龍門都將厯年功不就坐流元睦僭立授大鴻臚卿子桃湯位奉朝請

尉古真代人也道武之在賀蘭部賀染干遣侯引乙突等詣行宮將肆逆古真知之密以馳告侯引等不敢發染干疑古真泄其謀乃執拷之以兩車軸押其頭傷其目不伏乃免之登國初從征庫莫奚及叱突隣並有

功又從平中原賜爵東州侯明元初為鴻飛將軍鎮大洛卒於定州刺史子億萬襲古真弟諾少侍道武以忠謹著稱從道武圍中山諾先登傷一目道武歎曰諾兄弟並毀其目以建功效誠可嘉也寵待遂隆賜安樂子從平姚平還拜國部大人太武時改封遼西公卒第八子歡襲諾長子眷忠謹有父風明元時執事左右為太官令時侍臣受斤亡入蠕蠕詔眷追之遂至虜庭禽之大檀前由是以驍烈聞太武即位命眷與散騎侍郎劉

庫仁等八人分典四部綱奏機要加陳兵將軍文成時
拜侍中太尉封漁陽王與太宰常英等錄尚書事文成
北巡狩以寒雪方降議還眷曰今去都不遠而旋虜必
疑我有內難雖方寒雪宜更進前遂度漠而還帝以眷
元老賜杖履上殿薨謚曰莊子多侯襲多侯有武幹獻
文時假節領護羌戎校尉敦煌侯將至鎮求率輕騎五
千入于闐兼平諸國因敵取資以平定為效弗許孝文
初又求北取伊吾斷蠕蠕通西域路帝善其計以東作

方興難之為妻元所害多侯弟子慶賓善騎射有將畧
稍遷大中大夫明帝時朝議送蠕蠕主阿那瓌還國慶
賓上表固爭不從後蠕蠕遂執行臺元孚慶賓後拜肆
州刺史時爾朱榮兵威漸盛曾經肆州慶賓惡之據城
不納榮襲之拘還秀容呼為假父後以憂還都尋起為
光祿大夫督鎮汝陰還朝卒贈司空子瑾列在齊史眷
弟地干機悟有才藝馳馬立射五的時人莫能及太武
時位庫部尚書加散騎常侍領侍輦郎奉上忠謹尤善

嘲笑太武見其效人舉措忻悅不能自勝甚見親愛參
軍國大謀時征平原試衝車以攻冢地干為索所縕折
脅而卒帝親往哭慟贈中領軍燕郡公謚曰惠子長壽
位右曹殿中尚書賜爵會稽公卒於涇州刺史古真族
玄孫聿字成興性耿介明帝時為武衛將軍時領軍元
又執權百寮莫不加敬聿獨長揖不拜尋出為涼州刺
史涼州緋色天下之最又送白綾二千匹令聿染聿拒
不受又諷御史劾之驛徵至京覆無狀還任卒

穆宗代人也其先効節於神元桓穆之時崇機捷便辟少以盜竊為事道武之居獨孤部崇常往來奉給時人無及者劉顯之謀逆也平文皇帝外孫梁眷知之密遣崇告道武眷謂崇曰顯若知之雖刀劍剝割勿泄也因以寵妻及所乘良馬付崇曰事覺吾當以此自明崇來告難道武馳如賀蘭部顯果疑眷泄其謀將囚之崇乃唱言曰梁眷不顧恩義將顯為逆今我掠得其妻馬足以雪忿顯聞而信之窟咄之難崇外甥子植等與崇謀

軌道武以應之崇夜告道武道武誅植等北踰陰山復
幸賀蘭部崇甚見寵待道武為魏王拜崇征虜將軍後
平中原賜爵厯陽公散騎常侍後遷太尉除豫州刺史
又徙宜都公天賜三年薨先是衛王儀謀逆崇豫焉道
武惜其功而祕之及有司奏謚道武親覽謚法至述義
不克曰丁道武曰此當矣乃謚丁公初道武避窟咄難
遣崇還察人心崇留馬與從者微服入其營會有火光
為春妾所識賊皆驚起崇求從者不得因匿坑中徐乃

竊馬奔走宿於大澤有白狼向崇號崇覺悟馳隨狼奔
遂免難道武異之命崇立祀子孫世奉焉太和中追進
錄功臣以崇配饗崇長子逐留以功賜爵零陵侯後以
罪廢子乙以功賜爵富城公卒於侍中謚曰靜子真尚
長城公主拜駙馬都尉後勅離婚納文明太后姊位南
部尚書侍中卒謚曰宣孝文追思崇勲令著作郎韓顯
宗與真撰定碑文建於白登山真子泰本名石洛孝文
賜名焉以功臣子孫尚章武長公主拜駙馬都尉典羽

獵四曹事後為尚書右僕射馮翊侯出為定州刺史初
文明后幽孝文於別室將謀黜廢泰切諫乃止孝文德
之故寵待隆至自陳久病乞為恒州許之泰不願遷都
潛圖叛乃與定州刺史陸叡及安樂侯元隆等謀推朔
州刺史陽平王臘為主臘密表其事帝乃遣任城王澄
發并肆兵討之澄先遣書侍御史李煥單騎入代出其
不意泰等驚駭計無所出煥曉諭逆徒示以禍福於是
凶黨離心莫為之用泰自度必敗乃率麾下攻煥郭門

不克走出為人所禽送孝文幸代秦等伏誅子士儒字
叔賢徙涼州後得還為太尉參軍事子子容少好學無
所不覽求天下書逢即寫錄所得萬餘卷魏末為兼通
直散騎常侍聘梁齊受禪卒於司農卿遂留弟觀字闔
拔襲崇爵少以文藝知名明元中位為左衛將軍館門
下中書出納詔命及訪舊事未嘗有遺漏尚宜陽公主
拜駙馬都尉位太尉太武監國觀為右弼出則統攝朝
政入則應對左右事無巨細皆關決焉終日怡怡無慍

色勞謙善誘不以富貴驕人泰恒八年暴疾薨年三十
五明元親臨其喪悲動左右賜以通身隱起金飾棺喪
禮一依安成王叔孫俊故事贈宜都王謚曰文成太武
即位每與羣臣談宴未嘗不歎息殷勤以為自道武以
來佐命勲臣文武兼資無及之者子壽襲爵尚樂陵公
主拜駙馬都尉明敏有父風太武愛重之擢為下大夫
敷奏機辯有聲內外遷侍中中書監領南部尚書進爵
宣都王加征東大將軍壽辭曰臣祖崇先皇之世屢逢

艱危幸天贊梁眷誠心先告故得効功前朝流福於後
昔陳平受賞歸功無知今眷元勲未錄臣獨奕世受榮
豈惟仰媿古賢抑亦有虧國典太武嘉之乃求眷孫賜
爵郡公輿駕征涼州命壽輔景穆總錄機要內外聽焉
次雲中將濟河帝別御靜室召壽及司徒崔浩尚書李
順謂壽曰蠕蠕吳提與牧犍連和今聞朕征涼州必來
犯塞若伏兵漢南殄之為易牧田訖可分伏要害以待
虜至引使深入然後擊之若違朕指授為虜侵害朕還

斬卿崔浩李順為證非虛言也壽信卜筮言謂賊不來竟不設備吳提果至京邑大駭壽不知所為欲築西郭門請景穆避保南山惠保太后不聽乃止遣司空長孫道生等擊之太武還以無大損傷故不追咎景穆監國壽與崔浩等輔政人皆敬浩壽獨陵之又自恃位任以人莫已及謂其子師曰但令吾兒及我亦足勝人不須苦教之遇諸父兄有如僕隸夫妻並坐共食而令諸父飯餘為時人鄙笑薨贈太尉謚曰文宣子平國襲爵尚

城陽長公主拜駙馬都尉侍中中書監為太子四輔卒
子伏干襲爵尚濟北公主拜駙馬都尉卒謚曰康無子伏
干弟羆襲爵尚新平長公主拜駙馬都尉虎牢鎮將頻
以不法致罪孝文以其勲德之舊讓而赦之轉吐京鎮
將深自尅勵後改吐京鎮為汾州仍以羆為刺史前吐
京太守劉升在郡甚有威惠限滿還都胡人八百餘人
詣羆請之前定陽令吳平仁亦有恩信戶增數倍羆以
吏民懷之並為表請孝文皆從焉羆既頻薦升等所部

守令咸自砥礪威化大行州人李軌郭及祖七百餘人
詣闕稱羣恩德孝文以羣政和人悅增秩延限後徵為
光祿勳隨例降王為魏郡公累遷侍中中書監穆泰之
反羣與潛通赦後事發削封為編戶卒於家宣武時追
贈鎮北將軍恒州刺史羣弟亮字幼輔早有風度獻文
時起家侍御中散尚中山長公主拜騎馬都尉封趙郡
王加侍中徙封長樂王孝文時除征南大將軍領護西
戎校尉仇池鎮將宕昌王梁彌機死子彌博立為吐谷

渾所逼來奔仇池亮以彌博先悖氐羌所棄彌機兄子
彌承戎人歸樂表請納之孝文從焉於是擊走吐谷渾
立彌承而還氏豪楊卜自延興以來從軍二十一戰前
來鎮將抑而不聞亮表卜為廣業太守豪右咸悅境內
大安徵為侍中尚書左僕射於時復置司州孝文曰司
州始立未有寮吏須立中正以定選舉然中正之任必
須德望兼資世祖時崔浩為冀州中正長孫嵩為司州
中正可謂得人公卿等宜審推舉尚書陸叡舉亮為司

州大中正後拜司空參議律令例降爵為公時文明太
后崩已過朞月孝文毀瘠猶甚亮表請上承金冊遺訓
下稱億兆之心時襲輕服數御常膳修崇郊祠垂惠咸
秩詔曰苟孝悌之至無所不通今飄風亢旱時雨不降
實由誠慕未濃幽顯無感也尋領太子太傅時將建太
極殿帝引見羣臣於太華殿曰將營殿宇今後徙居永
樂以避囂埃土木雖復無心毀之能不悽愴今故臨對
卿等與之取別此殿乃高宗所制爰歷顯祖逮朕沖年

受位於此但事來奪情將有改制仰唯疇昔唯深悲感
亮稽首請稽之卜筮又以去歲役作為功甚多太廟明
堂一年便就若仍歲頻興恐民力凋弊且材幹新伐願
待餘年帝曰朕遠覽前王無不興造故有周創業經營
靈臺洪漢受命未央是作草創之初猶尚如此況朕承
累聖之運屬太平之基欲及此時以就大功人生定分
修短命也著蔡雖智其如命何當委之分豈假卜筮移
御永樂宮後帝臨朝嘗謂亮曰三代之禮日出視朝自

漢魏以降禮儀漸殺晉令有朔望集公卿於朝堂而論政事亦無天子親臨之文今因卿等日中之集中前卿等自論政事中後與卿等共議可否遂命讀奏案帝親決之及遷都加武衛大將軍以本官董攝中軍事帝南伐以亮錄尚書事留鎮洛陽後帝自小平津汎舟幸石濟亮諫曰昔漢帝欲乘舟渡渭廣德欲以首血汚車輪帝乃感而就橋渭之小水猶尚若斯況洪河有不測之慮帝曰司空言是也及罷豫穆泰反事覺亮上表自効

帝優詔還令攝事亮固請久乃許之後徙封頓丘縣公以紹崇爵宣武即位拜尚書令司空公薨宣武親臨小斂贈太尉謚曰匡子紹字永業尚琅邪長公主拜駙馬都尉厯位祕書監侍中衛將軍太常卿中書令七兵殿中二尚書遭所生憂免官居喪以孝聞又厯衛大將軍中書監侍中領本邑中正紹無他才能而資性方重罕接賓客稀造人門領軍元乂當權熏灼曾往紹宅紹迎送下階而已時人歎尚之及靈太后欲黜乂猶豫未決

紹讚成之以功加特進侍中元順與紹同直常因醉入
紹寢所紹擁被而起正色讓順曰老身二十年侍中與
卿先君亟連職事縱卿後進何宜相排突也遂謝事還
家詔諭乃起除侍中託疾未起故免河陰之害莊帝立
爾朱榮徵之紹以為必死哭辭家廟及見榮捧手不拜
榮亦矯意禮之顧謂人曰穆紹不虛作大家兒車駕入
宮尋授尚書令司空進爵為王給班劍四十人仍加侍
中時河南尹李獎往詣紹獎以紹郡人謂必致敬紹又

恃封邑是獎國王匡坐待之不為動膝獎憚其位望致
拜而還議者兩譏焉未幾降王復本爵普泰元年除驃
騎大將軍開府青州刺史加都督未行而薨贈大將軍
尚書令太保謚曰文獻子長嵩字子岳襲爵位光祿少
卿平國弟正國尚長樂公主拜駙馬都尉正國子平城
早卒孝文時始平公主薨於宮追贈平城駙馬都尉與
公主冥婚壽弟多侯封長寧子位司衛監文成崩乙渾
專權名司徒陸麗麗時在溫湯療疾多侯謂曰渾有無

君心大王衆所望也去必危宜徐歸而圖之麗不從遂
為渾所害多侯亦見殺觀弟翰平原鎮將西海王薨子
龍兒襲降爵為公卒子弼有風格善自位置涉獵經史
與長孫承業陸希道等齊名然矜已陵物頗以此損焉
孝文定氏族欲以弼為國子助教弼辭以為屈帝曰朕
欲敦勵胄子屈卿先之白玉投泥豈能相汚弼曰既遇
明時恥沈泥滓會司州牧咸陽王禧入帝曰朕與卿作
州督舉一主簿即命弼謁之因為帝所知宣武初為廣

平王懷國郎中令數有匡諫之益除中書舍人卒於華州刺史謚曰懿翰弟顥有才力以侍御郎從太武征赫連昌勇冠一時賜爵泥陽子拜司衛監從太武田崑山有虎突出顥搏而獲之帝歎曰詩云有力如虎顥乃過之後從征白龍討蠕蠕以功進爵建安公後拜殿中尚書出鎮涼州還加散騎常侍領太倉尚書文成時為征西大將軍督諸軍西討吐谷渾坐擊賊不進免官爵徙邊文成以顥著勲前朝徵為內都大官卒贈征西大將

軍建安王謚曰康子寄生襲崇宗人醜善道武初率部
歸附與崇同心戮力捍禦左右拜天部大人居東蕃子
莫提從平中原位相州刺史假陵陽侯其子孫位亦通
顯

奚斤代人也世典馬牧父簾有寵於昭成皇帝時國有
良馬曰騶騶一夜忽逸後知南部大人劉庫仁所盜養
於窟室簾聞而馳往取馬庫仁以國甥恃寵慙而逆擊
簾簾捽其髮落傷其一乳及苻堅使庫仁與衛辰分領

國部簞懼遂奔衛辰及道武滅衛辰簞晚乃得歸故名
位後於近臣斤機辯有識度登國初與長孫肥等俱統
禁兵後以為侍郎親近左右從征慕容寶於參合皇始
初拜越騎校尉典宿衛禁族車駕還京師博陵渤海章
武諸郡羣盜並起斤與略陽公元遵等討平之從征破
高車諸部又破庫狄宥連部徙其別部諸落於塞南又
進擊俟莫陳部至大娥谷置戍而還遷都水使者出為
晉兵將軍幽州刺史賜爵山陽侯明元即位為鄭兵將

軍詔以斤世忠孝贈其父簞長寧子明元幸雲中斤留
守京師昌黎王慕容伯兒謀反斤召入天安殿東廡下
誅之詔與南平公長孫嵩等俱坐朝堂錄決囚徒明元
大閱丁東郊講武以斤行左丞相事蒐於石會山車駕
西巡詔斤先驅討越勒部於鹿那山大破之又詔斤與
長孫嵩等八人坐止車門左聽理萬機拜天部大人進
爵為公命斤出入乘輶軒備威儀導從太武之為皇太
子臨朝聽政以斤為左輔宋廢主義符立其國內離阻

乃遣斤收河南地仍假斤節都督前鋒諸軍事司空晉
兵大將軍行揚州刺史率吳兵將軍公孫表等南征用
表計攻滑臺不拔求濟師帝怒其不先略地切責之乃
親南巡次中山斤自滑臺趨洛陽長驅至虎牢遂平兗
豫諸郡還圍虎牢及虎牢平斤置守宰以撫之自魏初
大將行兵唯長孫嵩拒宋武斤征河南獨給漏刻及十
二牙旗太武即位進爵宜城王仍為司空太武征赫連
昌遣斤率義兵將軍封禮等襲蒲坂斤又西據長安秦

雍氐羌皆來歸附與赫連定相持累戰破定定聞昌敗
走上邽斤追至雍不及而還詔斤班師斤請因其危平
之乃進討安定昌退保平涼斤屯軍安定以糧竭馬死
深壘自固監軍侍御史安頡擊昌禽之昌衆復立昌弟
定為主守平涼斤恥以元帥而禽昌之功更不在已乃
舍輜重追定於平涼定衆將出會一小校有罪亡入賊
具告其實定知斤軍無糧乏水乃邀斤前後斤衆大潰
斤及將娥清劉拔為定所禽後太武尅平涼斤等得歸

免為宰人使負酒食從駕還京師以辱之尋拜安東將軍降爵為公太延初為衛尉改為弘農王後為萬騎大將軍太武議伐涼州斤等三十餘人議以為不可帝不從涼州平以戰功賜僮隸七十戶又以斤元老賜安車平決獄訟諮詢朝政斤聰辯彊識善於談論遠說先朝故事雖未皆是時有所得聽者歎美之每議大政多見從用朝廷稱焉太平真君九年薨時年八十九太武親臨哀慟謚曰昭王斤有數十婦子男二十餘人長子他

觀襲爵太武曰斤自西土之敗國有常刑以其佐命先朝故復其爵秩將收益明之効今斤終其天年君臣之分全矣於是降他觀爵為公傳國至孫緒無子國除太和初孝文追錄先朝功臣以斤配饗廟庭宣武繼世以緒弟子監紹其後

叔孫建代人也父骨為昭成母王太后所養與皇子同列建少以智勇著稱道武之幸賀蘭部常從左右登國初為外朝大人與安同等十三人迭典庶事參軍國之

謀隨秦王觚使慕容垂歷六載乃還累遷中領軍賜爵安平公出為并州刺史後以公事免守鄴城圍明元即位念前功以為正直將軍相州刺史飢胡劉虎等聚黨叛明元假建節前號安平公督公孫表等以討虎斬首萬餘級餘衆奔走投汾水死水為不流晉將劉裕伐姚泓令其部將王仲德為前鋒將逼滑臺兗州刺史尉建率所部棄城濟河仲德遂入滑臺乃宣言曰晉本意欲以布帛七萬疋假道於魏不謂魏之守將便爾棄城明

元聞之詔建度河曜威斬尉建投其屍於河呼仲德軍
人與語詰其侵境之狀尋遷廣阿鎮將威名甚著久之
除使持節都督前鋒諸軍事楚兵將軍徐州刺史率衆
自平原濟河徇下青兗諸郡遂東入青州圍宋刺史竺
夔於東陽城宋遣將檀道濟王仲德救夔建不尅而還
以功賜爵壽光公與汝陰公長孫道生濟河而南仲德
等自清入濟東走青州太武以建威名南震為宋所憚
除平原鎮大將封丹陽王加征南大將軍先是簡幽易

以南戍兵集於河上一道攻洛陽一道攻滑臺宋將檀道濟王仲德救滑臺建與汝陰公道生拒擊之建分軍挾戰縱輕騎邀其前後焚燒穀草以絕糧道道濟兵飢叛者相繼由是安頓等得攻滑臺建沈敏多智東西征伐常為謀主容貌清整號曰嚴明又雅尚人倫禮賢愛士在平原十餘年綏懷內外甚得邊稱魏初名將鮮有及之南方憚其威略青充輶不為寇太延三年薨時年七十三謚曰襄賜葬金陵長子俊字醜歸少聰敏年十

五內侍左右性謹密初無過行以便弓馬轉為獵郎道
武崩清河王紹閉宮門明元在外紹拘逼俊以為已援
外雖從紹內實忠款仍與元磨渾等說紹歸明元時明
元左右唯車路頭王洛兒等及得俊等大悅以為爪牙
及即位稍遷衛將軍賜爵安成公及朱提王悅懷刃入
禁欲行大逆俊覺悅舉動有異乃於悅懷中得兩刃七
首遂執悅殺之明元以俊前後功重軍國大計一以委
之羣官上事先由俊銓校然後奏聞性平正柔和未嘗

有喜怒色忠篤愛厚不諂上抑下每奉詔宣外必告示
懇懃是以上下嘉歎泰恒元年卒時年二十八明元親
臨哀慟朝野無不追惜贈司空安成王謚孝元賜溫明
祕器載以輶輶車衛士導從陪葬金陵子楠襲爵後有
大功及寵幸貴臣薨賄贈送終禮皆依俊故事無得踰
之者初俊幸明元命其妻桓氏曰夫生既共榮沒宜同
穴能殉葬者可任意桓氏乃縊遂合葬焉俊既為安成
王俊弟隣襲父爵降為丹陽公位尚書令涼州鎮大將

與鎮副將奚牧並以貴戚子弟競貪財貨遂相糾坐誅
安同遼東胡人也其先祖曰世高漢時以安息王侍子
入洛歷魏至晉避亂遼東遂家焉父屈仕慕容暐暐為
苻堅所滅屈友人公孫眷妹沒入苻氏宮出賜劉庫仁
為妻庫仁貴寵之同隨眷商販見道武有濟世才遂留
奉侍性端嚴明惠好長者之言登國初道武徵兵於慕
容垂同頻使稱旨為外朝大人與和跋等出入禁中迭
典庶事從征姚平於柴壁姚興悉衆救平同進計曰汾

東有蒙阨東西三百餘里徑路不通姚興來必從汾西乘高臨下直至柴壁如此則寇內外勢接宜截汾為南北浮橋乘西岸築圍西圍既固賊至無所施其智力矣從之興果視平屠滅而不能救以謀功賜爵北新侯明元即位命同與南平公長孫嵩並理民訟又詔同與肥如侯賀護持節循察并定二州及諸山居雜胡丁零宣詔撫慰問其疾苦糾舉守宰不法郡國肅然同東出井陘至鉅鹿發衆修大嶺山通天門闢又築城於宋子以

鎮靜郡縣護嫉同得衆心使人告同築城聚衆圖大事
上知其誣不問太武監國臨朝聽政以同為左輔及即
位進爵高陽公冀青二州刺史同長子屈明元時典太
倉事盜官粳米數石欲以養親同大怒求戮屈自効不
能訓子帝嘉而恕之遂詔長給米同在官明察長於校
閱家法修整為世所稱及在冀州年老頗殖財貨大興
寺塔為百姓所苦卒贈高陽王謚曰恭惠屈弟原雅性
矜嚴沈勇多智略明元時為獵郎出監雲中軍事時赫

連屈丐犯河西原以數十騎擊之殺十餘人帝以原輕
敵違節度將加罪然知原驍勇遂任以為將鎮雲中蠕
蠕犯塞原輒破之以功賜爵武原侯加魯兵將軍太武
即位拜駕部尚書車駕征蠕蠕大檀分為五道遷尚書
左僕射進爵河間公原在朝無所比周然恃寵驕恣多
所排抑為子求襄城公盧魯元女魯元不許原告其罪
狀事相連逮歷時不決原懼不勝遂謀逆事泄伏誅原
兄弟外節儉而內實積畜及誅後籍其財至數萬第頡

辯慧多策略最有父風元初為內侍長令察舉百寮
糾刺姦匿無所迴避嘗告其父陰事帝以為忠特親寵
之宜城王奚斤自長安追赫連昌至安定頡為監軍侍
御史斤以馬多疫死士衆乏糧乃築壘自固遣太僕丘
堆等督租於民間為昌所敗昌遂驕矜日來侵掠頡曰
等死當戰死寧可坐受囚乎斤以馬死為辭頡乃陰與
尉眷等謀選騎焉昌來攻壘頡出應之昌馬蹶而墜頡
禽昌送京師賜爵西平公代堆統攝諸軍赫連定將復

入長安詔頡鎮蒲坂以拒之宋將到彥之寇淮南以援定列守南岸至於衡關太武西征定以頡為援軍將軍督諸軍擊彥之遂濟河攻洛陽拔之進攻虎牢虎牢潰又琅邪王司馬楚之平滑臺禽宋將朱修之李元德及東郡太守申謨乃振旅還京師進爵為王卒謚曰襄頡為將善綏士衆及卒宋士卒降者無不歎惜

庾業延代人也後賜名岳其父及兄和辰世典畜牧稍轉中部大人昭成崩苻氏內侮事難之間收斂畜產富

擬國君劉顯謀逆道武外幸和辰奉獻明太后道武歸
又得其資用以和辰為內侍長和辰分別公私舊畜頗
不會旨道武由是恨之岳獨恭慎修謹善處危難之間
道武嘉之與王建等俱為外朝大人參預軍國從平中
原拜安遠將軍官軍之警於柘肆也賀蘭部帥附力眷
紇突厥部帥匿物尼紇奚部帥叱奴根等聞之反於陰
館南安公元順討之不剋詔岳討破離石叛胡帥呼延
鐵西河叛胡帥張崇等以功賜爵西昌公遷鄴行臺岳

為將有謀略士衆服其智勇名冠諸將及罷鄴行臺以
所統六郡置相州即拜岳為刺史秉法平當百姓稱之
鄴舊有園池時果初熟丞吏送之岳不受曰果未進御
吾何得先食其謹如此遷司空岳兄子路有罪諸父兄
弟悉誅特赦岳父子俟官告岳父子衣服鮮麗行止風
采擬儀人君遇道武不豫多所猜忌遂誅之時人咸惜
焉岳葬在代西善無界後太武征赫連氏經其墓宅愴
然改容遂下詔為立廟令一州之人四時致祭求其子

孫任為帥者得其子陵從征有功聽襲爵

王建廣寧人也祖姑為平文后生昭成皇帝伯祖豐以
帝舅貴重豐子支尚昭成女甚見親待建少尚公主登
國初為外朝大人與和跋等十三人迭典庶事參預計
謀道武遣使慕容垂建辭色高亢垂壯之還為左大夫
建兄迴時為大夫諸子多不慎法建具以狀聞迴父子
伏誅其訐直如此從征伐諸國破二十餘部又從征衛
辰破之為中部大人破慕容寶於參合帝乘勝將席卷

南夏於是簡擇俘衆有才能者留之其餘欲悉給衣糧遣歸令中州之人咸知恩德建以為寶覆敗於此國內空虛獲而歸之縱敵生患不如殺之帝曰若從建言非伐罪弔民之義諸將咸以建言為然建又固執乃坑之帝既而悔焉并州既平車駕出井陘次恒山諸郡皆降唯中山鄴信都三城不下乃遣衛王儀南攻鄴建攻信都等城建等攻城六十餘日不能剋士卒多傷帝自中山幸信都降之車駕幸鉅鹿破寶衆軍於柏肆塢遂圍

中山寶棄城走和龍城內無主將夜入乘勝據守其門
建貪而無謀意在虜獲恐士卒肆掠盜亂府庫請候天
明帝乃止是夜徒河人共立慕容麟為主遂閉門固守
帝乃悉衆攻之使人登巢車臨城招其衆皆曰但恐如
參合之衆故求延月日命耳帝聞之顧視建而唾其面
中山平賜建爵濮陽公遷太僕徙真定公加散騎常侍

青冀二州刺史陪葬金陵

羅結代人也其先世領部落為魏附臣劉顯之逆結從

道武幸賀蘭部後以功賜爵屈蛇侯太武初累遷侍中外都大官總三十六曹事年一百七歲精爽不衰太武以其忠慤甚信待之監典後宮出入卧內因除長秋卿年一百一十詔聽歸老賜大寧東川為私第別業并為築城即號曰羅城朝廷每有大事驛馬詢問焉年一百二十卒贈幽州刺史謚曰貞子斤從太武討赫連昌力戰有功歷位四部尚書從平涼州以功賜爵帶方公除長安鎮都大將會蠕蠕侵境除柔元鎮都大將卒謚曰

靜陪葬金陵子敢襲爵位庫部尚書卒子伊利襲

婁伏連代人也代為首帥伏連忠厚有器量年十三襲父位領部落道武初從破賀蘭部又平中山及征姚平於柴壁以功賜爵安邑侯明元時為晉兵將軍并州刺史太武即位封廣陵公再遷光祿勳進爵為王後鎮統萬薨謚恭王子真襲降爵為公真弟大拔封鉅鹿子大拔孫寶字道成性淳朴好讀書明帝時仕至朔州刺史時邊事屢興民多流散及寶至稍安集之殘壞舊宅皆

命葺構人歸繼路歲考為天下最後隨大都督源子邕
討擊葛榮王師敗績寶因於榮軍變姓名匿於戎伍以
免害久之賊中有朔州人識寶者謂寶曰使君寧自苦
至此遂將詣榮榮笑曰婁公吾方圖事何相見之晚因
顧謂人曰此公行善天道報之得免亂兵即其驗也寶
遇逃者密啟賊形勢規為內應天子感其壯志召寶弟
二子景賢授員外散騎常侍郎葛榮滅寶始得還永安
中除假員外散騎常侍使蠕蠕先是蠕蠕稱藩上表後

以中州不競書為敵國之儀寶責之蠕蠕主大驚自知
罪惡謝曰此作書人誤遂更稱藩孝武立勅寶與行臺
長孫子彥鎮恒農後從入關封廣寧縣伯大統元年詔
領著作郎監修國史事平封平城縣子後授國子祭酒
侍中進儀同三司兼太子太傅攝東宮詹事寶為人清
簡少言頗諳舊事位歷師傅守靖謙恭以此為人所敬
後行涇州事卒於州

間大肥蠕蠕人也道武時歸魏尚華陰公主賜爵期思

子與弟並為上賓入八議明元即位為內都大官進爵
為侯宣城王奚斤之攻虎牢大肥與娥清領十二軍出
中道太武初復與奚斤出雲中白道討大檀破之後從
討赫連昌以功授榮陽公公主薨復尚濩澤公主太武
將拜大肥為王遇疾卒

奚牧代人也重厚有智謀道武寵遇之稱曰仲兄初劉
顯謀逆梁眷知之潛使牧與穆崇至七个山以告帝錄
先帝舊臣又以牧告顯功使敷奏政事參與計謀從征

慕容寶以功拜并州刺史賜爵任城公州與姚興接界
興頗寇邊牧乃與興書稱頓首禮抗之責興侵邊不直
之意興以與國和通恨之有言於道武道武戮之

和跋代人也世領部落為魏附臣至跋以才辯知名道
武擢為外朝大人參軍國大謀雅有智算賜爵日南公
從平中原以功進為尚書鎮鄴以破慕容德軍改封定
陵公與恒山王遵討賀蘭部別帥木易干破之出為平
原太守道武寵跋過於諸將羣臣皆敦尚恭儉而跋專

修虛譽炫曜於時性尤奢淫帝戒之不革後車駕北狩
豺山收跋刑之路側妻劉氏自殺以從初將刑跋道武
命其諸弟毗等視訣跋謂毗曰灘北地瘠可居水南就
耕良田廣為產業各相勸勵令之背已曰汝曹何忍視
吾之死毗等解其微意詐稱使者奔長安道武誅其家
後太武幸豺山校獵忽暴霧四塞怪問之羣下僉言跋
世居此祠冢猶存或者能致斯變帝遣建興公古弼祭
以三牲霧即除後太武蒐狩之日每先遣祭之

莫題代人也多智有才用初為幢將領禁兵道武之征
慕容寶寶夜犯營軍人驚駭遂有亡還京師者言官軍
敗於柏肆京師不安南安公元順因欲攝國事題曰大
事不可輕爾不然禍將及矣順乃止後封高邑公窟咄
寇南鄙題時貳於帝遺箭於窟咄謂之曰三歲犢豈勝
重載言窟咄長而帝少也帝既銜之後有告題居處倨
傲擬則人主帝乃使人示之以箭告之曰三歲犢能勝
重載不題奉詔父子對泣詰朝乃刑

賀狄干代人也家本小族世忠厚為將以平當稱稍遷
北部大人登國初與長孫嵩為對明於聽察為人愛敬
道武遣狄干致馬千匹結婚於姚長會長死興立因止
狄干而絕婚興弟平寇平陽道武討平之禽其將狄伯
支唐小方等四十餘人後興以駿馬千匹贖伯支而遣
狄干還帝許之狄干在長安因習讀書史通論語尚書
諸經舉止風流有似儒者初帝普封功臣狄干雖為姚
興所留遙賜狄干爵襄武侯加秦兵將軍及狄干至帝

見其言語衣服類中國以為慕而習之故忿焉既而殺之

李栗鴈門人也昭成時父子入北栗少辯捷有才能兼將略初隨道武幸賀蘭部愛其藝能時王業草創爪牙心腹多任親近唯栗一介遠寄兼非戚舊數有戰功拜左軍將軍栗性簡慢矜寵不率禮每在道武前舒放倨傲不自祇肅笑唾任情道武積其宿過誅之於是威嚴始厲制勒羣下盡謙卑之禮自栗始也

奚眷代人也少有將略道武世有戰功明元時為虎牢
鎮將為寇所憚太武時賜爵南陽公及征蠕蠕眷以部
曹尚書督偏將出別道詔會鹿渾海眷與中山王辰等
諸大將俱後期斬於都南爵除

燕鳳字子章代人也少好學博綜經史明習陰陽讖緯
昭成素聞其名使人以禮迎致之鳳不應聘及軍圍代
城謂城人曰燕鳳不來吾將屠汝代人懼遂送鳳昭成
與語大悅待以賓禮後拜代王左長史參決國事又以

經授獻明帝苻堅遣使牛恬朝貢令鳳報之堅問鳳代
王何如人對曰寬和仁愛經略高遠一時雄主也常有
并天下之志堅曰卿輩北人無剛甲利兵敵弱則進彊
則退走安能并兼邪鳳曰北人壯悍上馬持三仗驅馳
若飛主上雄俊率服北土控弦百萬號令若一軍無輜
重樵爨之苦輕行速捷因敵取資此南方所以疲弊而
北方之所以常勝也堅曰彼國人馬多少鳳曰控弦之
士數十萬見馬一百萬匹堅曰卿言人衆則可說馬太

多鳳曰雲中川自東山至西河二百里北山至南山二百餘里每歲孟秋馬常大集略為滿川以此推之使人言猶未盡鳳還堅厚加贈遺及昭成崩道武將遷長安鳳以道武幼弱固請於苻堅曰代主初崩臣子亡叛遺孫冲幼莫相輔立其別部大人劉庫仁勇而有智鐵弗衛辰狡猾多變皆不可獨任宜分諸部為二令各統之兩人素有深讐其勢莫敢先發此禦邊之良策待其孫長乃存而立之是陛下施大惠於亡國也堅從之鳳尋

東還及道武即位歷吏部郎給事黃門侍郎行臺尚書
甚見禮重明元世與崔宏封懿梁越等入講經傳出議
朝政太武初以舊勲賜爵平舒侯加鎮遠將軍神麌元
年卒子才襲

許謙字元遜代人也少有文才善天文圖讖之學逮建
國時將家歸附昭成嘉之擢為代王郎中令兼掌文記
與燕鳳俱授獻明帝經從征衛辰以功賜僮隸三十戶
昭成崩後謙徙長安苻堅從弟行唐公洛鎮和龍請謙

之鎮未幾以繼母老辭歸登國初遂歸道武道武悅以為右司馬與張袞等參贊初基慕容寶之來寇也道武使謙告難於姚興興遣將楊佛嵩來援佛嵩稽緩道武命謙為書遺之佛嵩乃倍道兼行道武大悅賜謙爵關內侯寶敗重遣謙與佛嵩盟明年慕容垂復來寇道武謂謙曰事急矣卿其行也謙未發而垂退及聞垂死謙上書勸進道武善之并州平以謙為陽曲護軍賜爵平舒侯安遠將軍皇始元年卒贈平東將軍左光祿大夫

幽州刺史高陽公謚曰文子洛陽襲明元追錄謙功以
洛陽為鴈門太守洛陽家田三生嘉禾皆異畝同穎太
武善之進爵北地公卒謚曰恭

崔宏字元伯清河東武城人魏司空林六世孫也祖悅
仕石虎位司徒左長史父潛仕慕容暉為黃門侍郎並
以才學稱宏少有雋才號曰冀州神童苻融之牧冀州
虛心禮敬拜陽平公侍郎冀州從事出總庶務入為賓
友衆事修理處斷無滯苻堅聞之徵為太子舍人辭以

母疾不就左遷著作佐郎太原郝軒名知人稱宏有王
佐才近代所未有也堅亡避難齊魯間為丁零翟釗及
晉叛將張願所留郝軒歎曰斯人也遇斯時不用扶搖
之勢而與鶴雀飛沈豈不惜哉仕慕容垂為吏部尚書
左丞高陽內史所歷著稱立身雅正雖在兵亂厲志篤
學不以資產為意妻子不免飢寒道武征慕容寶次中
山宏棄郡東走海濱帝素聞其名遣騎追求執送於軍
門引見與語悅之以為黃門侍郎與張衮對掌機要草

創制度時晉使來聘帝將報之詔有司博議國號宏議
曰三皇五帝之立號也或因所生之土或以封國之名
故虞夏商周始皆諸侯及聖德既隆萬國宗戴稱號隨
本不復更立唯商人屢徙故改號曰殷然猶兼行不廢
始基之號故詩云殷商之旅此其義也漢祖以漢王定
三秦威彊楚故遂以漢為國號國家雖統北方廣漠之
土逮於陛下應運龍飛雖曰舊邦受命惟新是以登國
之初改代曰魏又慕容永奉進魏土夫魏者大名神州

之上國斯乃革命之徵驗利見之元符也臣愚以為宜
號曰魏道武從之於是稱魏及帝幸鄴歷問故事宏應
對若流帝善之還次恒嶺帝親登山頂撫慰新人適遇
宏扶老母登嶺賜以牛米因詔諸徙人不能自進者給
以車牛遷吏部尚書時命有司制官爵撰朝儀協音樂
定律令申科禁宏總而裁之以為永式及置八部大人
以擬八坐宏通置三十六曹如令僕統事深被信任勢
傾朝廷而儉約自居不營產業家惟四壁出無車乘朝

晡步上母年七十供養無重膳帝聞而益厚重之厚加
饋遺時人亦譏過約而宏居之愈甚帝常引問古今舊
事王者制度治世之則宏陳古人制作之體及明君賢
臣往代廢興之由甚合上意未嘗蹇愕忤旨亦不諂諛
苟容及道武季年大臣多犯威怒宏獨無譴者由於此
也帝曾令宏講漢書至妻敬說漢高祖欲以魯元公主
妻匈奴善之嗟歎者良久是以諸公主皆釐降於賓附
之國朝臣子弟雖名族美彥不得尚焉尚書職罷賜宏

爵白馬侯加周兵將軍與舊功臣庾岳奚斤等同班而
信寵過之道武崩明元未即位清河王紹因人心不安
大出財帛班賜朝士宏獨不受紹財明元即位命宏居
門下虛已訪問特賜帛二百疋長孫嵩已下咸愧焉詔
遣使者循行郡國糾察守宰不如法者令宏與宜都公
穆觀等按之帝稱其平允又詔宏與長孫嵩等於朝堂
決刑獄明元以郡國豪右大人蠹害乃優詔徵之人多
戀本而長吏逼遣之於是輕薄少年因相扇動所在聚

結西河建興盜賊並起守宰討之不能禁帝乃引宏及
北新侯安同壽光侯叔孫建元城侯元屈等問焉宏欲
大赦以紓之屈等對曰不如先誅首惡赦其黨類宏曰
王者臨天下以安人為本何顧小曲直也夫赦雖非正
道而可以權行若赦而不改誅之不晚明元從之神瑞
初詔宏與南平公嵩等坐止車門總理機事并州胡數
萬南掠河內遣將軍公孫表等討之敗績帝問計於羣
臣宏曰表等諸軍不為不足但失於處分故使小盜假

息且胡衆雖多而無猛烈主將所謂千奴共一膽也宜
得大將素為胡所服信者將數百騎就攝表軍以討之
賊聞必望風震怖壽光侯建時在并州諸將莫及帝從
之遂平胡寇尋拜天部大人進爵為公泰恒三年夏宏
病篤帝遣侍中穆觀就受遺言侍臣問疾一夜數返卒
追贈司空謚文貞公喪禮一依安成王叔孫俊故事詔
羣臣及附國渠帥皆會葬自親王以外盡命拜送子浩
襲太和中孝文追錄先朝功臣以宏配饗廟庭浩字伯

深小名桃簡浩少好學博覽經史元象陰陽百家之言無不闡綜研精義理時人莫及弱冠為通直郎天興中給事祕書轉著作郎道武以其工書常置左右帝季年威嚴頗峻宮省左右多以微過得罪莫不逃隱避目下之變浩獨恭謹不怠或終日不歸帝知之輒命賜以御粥其祇直任時不為窮通改節皆此類也明元初拜博士祭酒賜爵武城子常授帝經書每至郊祠父子並乘輶軒時人榮之帝好陰陽術數聞浩說易及洪範五行

善之因命浩筮吉凶參觀天文考定疑惑浩綜覈天人
之際舉其綱紀者數家諸所處決多有應驗常與軍國
大謀甚為寵密時有兔在後宮檢無從得入帝令浩推
之浩謂當有隣國貢嬪嬌者明年姚興果獻女神瑞二
年秋穀不登大史令王亮蘇坦因華陰公主等言讞書
云國家當治鄴應大樂五十年勸帝遷都於鄴就穀浩
與特進周澹言於帝曰今國家遷都於鄴可救今年之
飢非長久之策也東州之人常謂國家居廣漠之地人

畜無算號稱牛毛之衆今留守舊都分家南徙恐不滿
諸州之地參居郡縣處榛林之下不便水土疾疫死傷
情見事露則百姓意沮四方聞之有輕侮之意屈丐及
蠕蠕必提挈而來雲中平城則有危殆之事阻隔恒代
千里之際須欲救援赴之甚難如此則聲實俱損矣今
居北方假令山東有變輕騎南出耀威桑梓之中誰知
多少百姓見之望塵振伏此是國家威制諸夏之長策
也至春草生乳酪將出兼有菜果足接來秋若得中熟

事則濟矣帝曰惟此二人與朕意同復使中貴人問浩
澹曰今既餉口無以至來秋或復不熟將如之何浩等
對曰可簡窮下之戶諸州就穀若來秋無年願更圖也
但不可遷都帝從之於是分民詣山東三州就食出倉
穀以廩之來年遂大熟賜浩澹妾各一人御衣一襲絹
五十疋綿五十斤初姚興死之前歲也太史奏熒惑在
瓠瓜星中一夜忽然亡失不知所在或謂下入危亡之
國將為童謠妖言而後行其災禍帝聞之驚乃召諸碩

儒十數人令與史官求其所詣浩對曰按春秋左氏傳
神降於莘其至之日各以其物也請以日辰推之庚午
之夕辛未之朝天有陰雲熒惑之亡當此二日之內庚
之與午皆主於秦辛為西夷今姚興據咸陽是熒惑入
秦矣諸人皆作色曰天上失星人安能知其所詣而妄
說無徵之言浩笑而不應後八十餘日熒惑果出於東
井留守盤旋秦中大旱赤地昆明池水竭童謠訛言國
內誼擾明年姚興死二子交兵三年國滅於是諸人乃

服曰非所及也泰恒元年晉將劉裕伐姚泓舟師自淮泗入欲泝河西上求假道詔羣臣議之外朝公卿咸曰正谷關號曰天險一人荷戈萬夫不得進裕舟船步兵何能西入揚言伐姚意或難測其水道最不可縱宜先發兵斷河上流勿令西過又議之內朝或同外計帝將從之浩曰非上策也姚興使司馬休之輩擾其荊州裕切齒久矣今興死子幼乘其危亡而伐之臣觀其意必欲入關勁躁之人不顧後患今若塞其西路裕必上岸

北侵如此則姚泓無事而我受敵矣今蠕蠕內寇民食
又乏不可發軍發軍赴南則北寇進擊若其救北則南
州復危未若假之水道縱裕西入然後興兵塞其東歸
之路所謂卞莊刺虎兩得之勢也使裕勝也必德我假
道之惠令姚氏勝也亦不失救隣之名縱使裕得關中
懸遠難守彼不能守終為我物今不勞兵馬坐觀成敗
鬪兩虎而收長久之利上策也夫為國之計擇利而為
之豈顧婚姻酬一女子之惠也假令國家棄恒山以南

裕必不能發吳越之兵與官軍爭守河北也居然可知
議者猶曰裕西入函谷則進退路窮腹背受敵北上岸
則姚軍必不出關助我揚聲西行意在北進其勢然也
帝遂從羣議遣長孫嵩發兵拒之戰於畔城為裕將朱
超石所敗師人多傷帝始恨不用浩計二年晉齊郡太
守王懿來降上書陳計稱劉裕在洛勸國家以軍絕其
後路則裕軍可不戰而尅書奏帝善之會浩在前進講
書傳帝問浩曰劉裕西伐前軍已至潼關以卿觀之事

得濟不對曰昔姚興好養虛名而無實用子泓又病衆
叛親離裕乘其危亡兵精將勇尅之必矣帝曰劉裕武
能何如慕容垂浩曰裕勝夫慕容垂承父祖累世之資
生便尊貴同類歸之若夜蛾之赴火少加倚仗便足立
功劉裕挺出寒微不階尺土之資不因一卒之用奮臂
大呼而夷滅桓玄北禽慕容超南摧盧循等僭晉陵遲
遂執國命裕若平泓而還必篡其主其勢然矣秦地戎
夷混并虎狼之國裕亦不能守之風俗不同人情難變

欲行荆揚之化於三秦之地是無翼而欲飛無足而欲走不可得也秦地當終為國家有帝曰裕已入關不能進不能退我遣精騎南襲彭城壽春裕亦何能自立浩曰今西北二寇未殄陛下不可親御六師兵衆雖盛而將無韓白長孫嵩有治國之用無進取之能非劉裕敵也臣謂待之不晚帝笑曰卿量之已審矣浩曰臣嘗私論近世人物不敢不上聞若王猛之治國苻堅之管仲也慕容恪之輔少主慕容暉之霍光也劉裕之平逆亂

司馬德宗之曹操也帝曰卿謂先帝如何浩曰小人管
窺乾象何能見昊穹之廣大雖然太祖用漠北淳樸之
人南入漢地變風易俗化洽四海自與羲農舜禹齊烈
臣豈能仰名帝曰屈丐何如浩曰屈丐家國夷滅一身
孤寄為姚氏封殖不思樹黨彊隣報讐雪恥乃結蠕蠕
背德於姚興擬豎小人無大經略正可殘暴終為人所
滅耳帝大悅語至中夜賜浩御縹醪酒十觚水精戎鹽
一兩曰朕味卿言若此鹽酒故與卿同其味也三年皆

星出天津入太微經北斗絡紫微犯天棓八十餘日至天漢而滅帝復召諸儒術士問之曰今天下未一四方岳峙災咎之應將在何國朕甚畏之浩對曰災異由人而起人無釁妖不自作臣按漢書載王莽篡位之前彗星出入正與今同國家主尊臣卑人無異望是為僭晉將滅劉裕篡逆之應也五年裕果廢其主而自立南鎮上宋改元赦書時帝幸東南烏湏池射鳥聞之驛馳召浩而謂曰往年卿言彗星之占驗矣朕於今日始信天

道初浩父疾篤浩乃剪髮截爪夜在庭中仰禱斗極為
父請命求以身代叩頭流血歲餘不息家人罕有知者
及父終居喪盡禮時人稱之襲爵白馬公自朝廷禮儀
文策詔誥軍國書記盡關於浩浩能為雅說不長屬文
而留心於制度科律及經術之言作家祭法次序五宗
蒸嘗之禮豐儉之節義理可觀性不好老莊之書每讀
不過數十行輒棄之曰此矯誣之說不近人情必非老
子所言老聃習禮仲尼所師豈設敗法之言以亂先王

之教袁生所謂家人筐篋中物不可揚於王庭也帝常有微疾而災異屢見乃使中貴人密問於浩曰春秋星孛北斗七國之君皆將有咎今茲日蝕於胃昴盡光趙代之分朕疾疚彌年療治無損恐一旦奄忽諸子並少將如之何其為我設圖後之計浩曰陛下春秋富盛聖業方融德以除災幸就平愈且天道冥遠或消或應昔宋景見災修德熒惑退舍願陛下遺諸憂慮恬神保和納御嘉福無以闇昧之說致捐聖思必不得已請陳瞽

言自聖化龍興不崇儲貳是以永興之始社稷幾危今宜早建東宮選公卿忠賢陛下素所委仗使為師傅左右信臣簡在聖心者以充賓友入總萬機出統戎政監國撫軍大柄在手若此則陛下可以優游無為頤神養壽進御醫藥萬歲之後國有成主民有所歸則奸宄息望旁無覬覦此乃萬代之令典塞禍之大備也今長皇子諱年漸一紀明睿溫和衆情所繫時登儲副則天下幸甚立子以長禮之大經若並待成人而擇倒錯天倫

則生履霜堅冰之禍自古以來載籍所記興衰存亡渺不由此帝納之於是使浩奉策告宗廟命太武為國副主居正殿臨朝司徒長孫嵩山陽公奚斤北新公安同為左輔坐東廂西向浩與太尉穆觀散騎常侍丘堆為右弼坐西廂東向百寮總已以聽焉明元避居西宮時隱而窺之聽其決斷大悅謂左右侍臣曰長孫嵩宿德舊臣厯事四世功存社稷奚斤辯捷智謀名聞遐邇安同曉解俗情明於校練穆觀達政事要識吾旨趣崔浩

博聞彊識精天人之會丘堆雖無大用然在公專謹以
此六人輔相吾子足以經國吾與汝曹遊行四境伐叛
柔服可得志於天下矣羣臣時奏事所疑明元曰此非
我所知當決之汝曹國主也會聞宋武帝殂明元欲取
虎牢滑臺浩曰陛下不以劉裕歛起納其使貢裕亦敬
事陛下不幸今死乘喪伐之雖得之不令春秋晉士丐
帥師侵齊聞齊侯卒乃還君子大其不伐喪以為恩足
以感孝子義足以動諸侯今國家亦未能一舉而定江

南宜遣人弔祭存其孤弱恤其凶災布義風於天下令德之事也若此則化被荆揚南金象齒羽毛之珍可不求而自至且裕新死黨與未離兵臨其境必相率拒戰功不可必不如緩之待其惡稔如其彊臣爭權變難必起然後命將揚威可不勞士卒而收河北之地明元既銳意南伐語浩曰劉裕因姚興死而滅其國裕死我伐之何為不可浩固執曰興死二子交爭裕乃伐之明元大怒不從浩言遂遣奚斤南伐議於監國之前曰先攻

城也先略地也斤曰請先攻城浩曰南人長於守城苻
氏攻襄陽經年不拔今以大國之力攻其小城若不時
剋挫損軍勢危道也不如分軍略地至淮為限列置守
宰收斂租穀滑臺虎牢反在軍北絕望南救必沿河東
走若或不然即是圍中之物公孫表請先圖其城斤等
濟河先攻滑臺經時不拔表請濟師明元怒乃親南巡
守拜浩相州刺史加左光祿大夫隨軍為謀主及車駕
之還也浩從明元幸西河太原登憩高陵之上下臨河

流傍覽川域慨然有感遂與同寮論五等郡縣之是非
考秦始皇漢武之違失浩好古識治體時伏其言天師
寇謙之每與浩言聞其論古治亂之迹常自夜達旦竦
意斂容無有懈倦既而歎美之曰斯人言也惠皆可底
行亦當今之臯繇也但世人貴遠賤近不能深察之耳
因謂浩曰吾行道隱居不營世務忽受神中之訣今當
兼修儒教輔助太平真君繼千載之絕統而學不稽古
臨事闇昧卿當為吾撰列王者政典并論其大要浩乃

著書二十餘篇上推太初下盡秦漢變弊之迹大旨先以復五等為本太武即位左右忌浩正直共排毀之帝雖知其能不免羣議故出浩令以公歸第及有疑議召而問焉浩纖妍白皙如美婦人而性敏達長於謀計常自比張良而謂已稽古過之既得歸第因欲修服食養性之術而寇謙之有神中錄圖新經浩因師事之始光中進爵東郡公拜太常卿時議討赫連昌羣臣皆以為難唯浩曰往年以來熒惑再守羽林越鈞陳咸皆拘忌

其占泰亡又今年五星併出東方利以西伐天應人和時會並集不可失也帝乃使奚斤等擊蒲坂而親率輕騎襲其都城大獲而還後帝復討昌次其城下收衆偽退昌鼓譟而前舒陣為兩翼會有風雨從東南來揚沙昏冥宦者趙倪進曰今風雨從賊後來我向彼背天不助人又將士飢渴願陛下攝騎避之更待後日浩叱之曰是何言歟千里制勝一日之中豈得變易賊前行不止後已離絕宜分軍隱出奄擊不意風道在人豈有恒

也帝曰善分騎奮擊昌軍大潰神䴥二年議擊蠕蠕朝
臣內外盡不欲行保太后亦固止帝帝皆不聽唯浩贊
成策略尚書令劉絜左僕射安原等乃使黃門侍郎仇
齊推赫連昌太史張淵徐辯說帝曰今年己巳三陰之
歲歲星襲月太白在西方不可舉兵北伐必敗雖尅之
不利於上又羣臣共贊和淵等云淵少時嘗諫苻堅不
可南征堅不從而敗今天時人事都不和協何可舉動
帝意不決乃召浩令與淵等辯之浩難淵曰陽者德也

陰者刑也故日蝕修德月蝕修刑夫王者之用刑大則陳之原野小則肆之市朝戰伐者用刑之大者也以此言之三陰用兵蓋得其類修刑之義也歲星襲月年飢民流應在他國遠期十二年太白行蒼龍宿於天文為東不妨北伐淵等俗生志意淺近牽於小數不達大體難與遠圖臣觀天文比年以來月行掩昴至今猶然其占三年天子大破旄頭之國蠕蠕高車旄頭之衆也夫聖明御時能行非常之事古人語曰非常之原黎民懼

焉及其成功天下宴然願陛下勿疑也淵等慙而言曰
蠕蠕荒外無用之物得其地不可耕而食得其民不可
臣而使輕疾無常難得而制有何汲汲而苦勞士馬也
浩曰淵言天時是其所職若論形勢非彼所知斯乃漢
世舊說常談施之於今不合事宜何以言之夫蠕蠕者
舊是國家北邊叛隸今誅其元惡收其善民令復舊役
非無用也漠北高涼不生蚊蚋水草美善夏則北遷田
牧其地非不可耕而食也蠕蠕子弟來降貴者尚公主

賤者將軍大夫居列滿朝又高車號為名騎非不可臣而畜也夫以南人追之則患其輕疾於國兵則不然何者彼能遠走我亦能遠逐非難制也往數入塞國人驚震今夏不乘虛掩進破滅其國至秋復來不得安卧自太宗之世迄於今日無歲不警豈不汲汲乎哉世人皆謂淵辯通解數術明決成敗臣請試之間其西國未滅之前有何亡徵知而不言是其不忠若實不知是其無術時赫連昌在坐淵等自以無先言慙赧而不能對帝

大悅謂公卿曰吾意決矣亡國之臣不可與謀信矣哉
而保太后猶疑之復令羣臣於保太后前評議帝謂浩
曰此等意猶不伏卿善曉之令寤既罷朝或有尤浩者
曰今吳賊南寇而舍之北伐行師千里其誰不知若蠕
蠕遠遁前無所獲後有南賊之患此危道也浩曰不然
今年不摧蠕蠕則無以禦南賊自國家并西國以來南
人恐懼揚聲動衆以衛淮北彼北我南彼征我息其勢
然矣北破蠕蠕往還之間故不見其至也何以言之劉

裕得關中留其愛子精兵數萬良將勁卒猶不能固守
舉軍盡沒號哭之聲至今未已如何正當國家休明之
世士馬彊盛之時而欲以駒犢齒虎口也設令國家與
之河南彼必不能守之自量不能守是以必不來若或
有衆備邊之軍耳夫見瓶水之凍知天下之寒嘗肉一
脔識餕中之味物有其類可推而得也且蠕蠕恃其絕
遠謂國家力不能至自寬來久故夏則散衆放畜秋肥
乃聚背寒向溫南來寇抄今出其慮表攻其不備大軍

卒至必驚駭星分望塵奔走牡馬護牧牝馬戀駒驅馳
難制不得水草未過數日朋聚而困弊可一舉而滅斃
勞永逸長久之利時不可失也唯患上無此意今聖慮
已決發曠世之謀如何止之陋哉公卿也諸軍遂行天
師謂浩曰是行也如之何可果尅乎浩對曰天時形勢
必尅無疑但恐諸將瑣瑣前後顧慮不能乘勝深入使
不全舉耳及軍入其境蠕蠕先不設備民畜布野驚怖
四奔於是分軍搜討東西五千里南北三千里凡所俘

虜及獲畜產車廬彌漫山澤蓋數百萬高車殺蠕蠕種
類降者三十餘萬落虜遂散亂矣帝沿弱水西行至涿
邪山諸大將果疑深入有伏兵勸帝止天師以浩襄日
之言固勸帝窮討帝不聽後有降人言蠕蠕大檀先被
疾不知所為乃焚燒穹廬乘車自載將數百人入山南
走民畜窶聚方六十里中無人統領相去百八十里追
軍不至乃徐徐西遁惟此得免後聞涼州賈胡言若復
前行二日則盡滅之矣帝深恨之大軍既還南賊終不

能動如浩所量浩明識天文好觀星變常置金銀銅鋌
於醉器中令青夜有所見即以鋌畫紙作字以記其異
帝每幸浩第多問以異事或倉卒不及束帶奉進蔬食
不暇精美帝為舉匕箸或立嘗而旋其見寵愛如此於
是引浩出入卧内加侍中特進撫軍大將軍左光祿大
夫以賞謀謨之功帝從容謂浩曰卿才智深博事朕祖
考忠著三世朕故延卿自近宜思盡規諫輔予弼予勿
有隱懷朕雖當時遷怒若或不用久久可不深思卿言

也因令歌工厯頌羣臣事在長孫道生傳又召新降高
車渠帥數百人賜酒食於前帝指浩以示之曰汝曹視
此人尪纖懦弱手不能彎弓持矛其胸中所懷乃踰於
兵甲朕始時雖有征討之意而志慮不自決前後勦捷
皆此人導吾令至此矣乃勅諸尚書曰凡軍國大計卿
等所不能決皆先諮詢然後施行俄而南蕃諸將表宋
師欲犯河南請兵三萬先其未發逆擊之因誅河北流
民在界上者絕其鄉導足以挫其銳氣使不敢深入詔

公卿議之咸言宜許浩曰此不可從也往年國家大破
蠕蠕馬力有餘南賊震懼常恐輕兵奄至卧不安席故
先聲動衆以備不虞非敢先發又南土下濕夏月蒸暑
水潦方多草木深邃疾疫必起非行師之時且彼先嚴
有備必堅城固守屯軍攻之則糧食不給分兵肆討則
無以應敵未見其利就使能來待其勞倦秋涼馬肥因
敵取食徐往擊之萬全之計在朝羣臣又西北守將從
陛下征討西滅赫連北破蠕蠕多獲美女珍寶馬畜成

羣南鎮諸將聞而生羨亦欲南鈔以取資財是以拔毛求瑕妄張賊勢冀得肆心既不獲聽故數稱賊動以恐朝廷背公存私為國生事非忠臣也帝從浩議南鎮諸將復表賊至而自陳兵少求簡幽州以南戍兵佐守就漳水造船嚴以為備公卿議者僉然欲遣騎五千并假署司馬楚之魯軌韓延之等令引誘邊民浩曰非上策也彼聞幽州以南精兵悉發大造舟船輕騎在後欲存立司馬誅除劉族必舉國駭擾懼於滅亡當悉發精兵

銳卒來備北境後審知官軍有聲無實恃其先聚必喜而前行徑來至河肆其侵暴則我守將無以禦之若彼有見機之人善設權譎乘間深入虞我國虛生變不難非制敵之良計今公卿欲以威力攘賊乃所以招令速至也夫張虛聲而名實害此之謂矣不可不思後悔無及我使在彼期四月前還可待使至審而後發猶未晚也楚之等是彼所忌將奪其國彼安得端坐視之故楚之往則彼來楚之止則彼息其勢然也且楚之等瑣才

能招合輕薄無賴而不能成就大功為國生事使兵連
禍結必此之羣矣臣嘗聞魯軌說姚興求入荊州至則
散敗乃不免蠻賊掠賣為奴使禍及姚泓已然之效浩
復陳天時不利於彼曰今茲害氣在揚州不宜先舉兵
一也午歲自刑先發者傷二也日蝕滅光晝昏星見飛
鳥墮落宿當斗牛憂在危亡三也熒惑伏匿於翼軫戒
亂及喪四也太白未出進兵者敗五也夫興國之君先
修人事次盡地利後觀天時故萬舉而萬全國安而身

盛今宋新國是人事未周也災變屢見是天時不協也
舟行水涸是地利不盡也三事無一成自守猶或不安
何得先發而攻人哉彼必聽我虛聲而嚴我亦承彼嚴
而動兩推其咎皆自以為應敵兵法當分災迎受害氣
未可舉動也帝不能違衆乃從公卿議浩復固爭不從
乃遣陽平王杜超鎮鄴琅邪王司馬楚之等屯潁川於
是賊來遂疾到彥之自清水入河沂流西行分兵列守
南岸西至潼關帝聞赫連定與宋縣分河北乃治兵欲

先討赫連羣臣皆曰劉義隆猶在河中舍之西行前寇
未可必尅而義隆乘虛則失東州矣帝疑焉問計於浩
浩曰義隆與赫連定同惡相招連結馮跋牽引蠕蠕規
逆肆心虛相唱和義隆望定進定待義隆前皆莫敢先
入以臣觀之有似連難不得俱飛無能為害也臣始謂
義隆軍來當屯住河中兩道北上東道向冀州西道衝
鄴如此則陛下當自致討不得徐行今則不然東西列
兵徑二千里中一處不過數千形分勢弱以此觀之寧

兒情見止望固河自守免死為幸無北度意也赫連定
殘根易摧擬之必仆尅定之後東出潼關席卷而前則
威震南極江淮以北無立草矣聖策獨發非愚近所及
願陛下必西行勿疑平涼既平其日宴會帝執浩手以
示蒙遜使曰所云崔公此是也才略之美當今無比朕
行止必問成敗決焉若合符契後冠軍將軍安頡軍還
獻南俘囚說南賊之言云宋勅其諸將若北國兵動先
其未至徑前入河若其不動住彭城勿進如浩所量帝

謂公卿曰卿輩前謂我用浩計為謬驚怖固諫常勝之家始皆自謂踰人遠矣至於歸終乃不能及遷浩司徒時方士祁纖奏立四王以日東西南北為名欲以致禎祥除災異詔浩與學士議之浩對曰先王建國以作藩屏不應假名以為其福夫日月運轉周歷四方京師所居在於其內四王之稱實奄邪畿名之則逆不可承用先是纖奏改代為萬年浩曰昔太祖道武皇帝應天受命開拓洪業諸所制置無不循古以始封岱土後稱為

魏故代魏兼用猶彼殷商國家積德著在圖史當享萬
億不待改名以為益也纖之所聞皆非正義帝從之是
時河西王沮渠牧犍內有貳意帝將討焉先問於浩浩
對曰牧犍惡心已露不可不誅官軍往年北伐雖不尅
獲實無所損於時行者內外軍馬三十萬匹計在道死
傷不滿八千歲常羸死恒不減萬乃不少於前而遠方
乘虛便謂大損不能復振今出其不圖大軍卒至必驚
懼騷擾不知所出禽之必矣牧犍幼弱諸弟驕恣爭權

縱橫人心離解加以比年以來天災地變都在秦涼誠
滅亡之國也帝曰善吾意亦以為然命公卿議之弘農
王奚斤等三十餘人皆表曰牧犍西垂下國雖心不為
純臣然繼父職貢朝廷接以蕃禮又王姬釐降罪未甚
彰謂且羈縻而已今士馬勞止宜可小息又其地鹵斥
略無水草大軍既到不得久停彼聞軍來必完聚城守
攻則難拔野無所掠於是尚書古弼李順之徒皆曰自
溫圍河以西至於涼州地純枯石了無水草不見流川

皆言姑臧城南天梯山上冬有積雪深一丈餘至春夏
消液下流成川引以溉灌彼聞軍至決此渠口水不通
流則致渴乏去城百里之內赤地無草又不任久停軍
馬斤等議是也帝乃命浩以其前言與斤共相難抑諸
人不復餘言唯曰彼無水草浩曰漢書地理志稱涼州
之畜為天下饒若無水草何以畜牧又漢人為居終不
於無水草之地築城郭立郡縣也雪之消液纔不斂塵
何得通渠引漕溉灌數百萬頃乎此言大訛誣於人矣

李順等復曰耳聞不如目見吾曹目見何可共辯浩曰汝曹受人金錢欲為人為辭謂我目不見便可欺也帝隱聽聞之乃出親見斤等辭旨嚴厲形於神色羣臣乃不敢復言但唯唯而已於是遂討涼州平之州饒水草如浩所言乃詔浩曰昔皇祚之興世隆北土太祖道武皇帝協順天人奄有區夏太宗承統光隆前緒朕以眇年獲奉宗廟即位之初不遑寧處揚威朔裔埽定赫連逮於神麌始命史職注集前功以成一代之典自爾已

來戎旗仍舉秦隴尅定徐兗無塵平逋寇於龍川討孽
隸於涼域而史闕其職篇籍不著每懼斯事之墜焉命
公留臺綜理史務述成此書務從實錄浩於是監祕書
事以中書侍郎高允散騎侍郎張偉參著作續成前紀
至於損益褒貶折衷潤色浩所總焉浩有鑒識以人倫
為已任明元太武之世徵海內賢才起自仄陋及所得
外國遠方名士拔而用之皆浩之由也至於禮樂憲章
皆歸宗於浩及景穆始總百揆浩復與宜都王穆壽輔

政事時又將討蠕蠕劉絜復致異議帝愈欲討之乃召
問浩浩對曰往擊蠕蠕師不多日絜等各欲迴還後獲
其生口云軍還之時去賊三十里是絜等之計過矣夫
北土多積雪至冬時常避寒南徙若因其時潛軍而出
必與之遇既與之遇則可禽獲帝以為然乃分軍為四
道詔諸將俱會鹿渾海期日有定而絜恨計不用沮誤
諸將無功而還帝西巡詔浩與尚書順陽公蘭延都督
行臺中外諸軍事帝至東雍親臨汾曲觀叛賊薛永宗

聖進軍圍之永宗出兵欲戰帝問浩曰今日可擊不浩
曰永宗未知陛下自來人心安閒北風迅疾宜急擊之
須臾必破若待明日恐其見官軍盛大必夜遁走帝從
之永宗潰滅車駕濟河前驅告賊在渭北帝至洛水橋
賊已夜遁詔問浩曰蓋吳在長安北九十里渭北地空
穀草不備欲度渭南西行何如浩對曰蓋吳營去此六
十里賊魁所在擊蛇之法當先破頭頭破則尾豈能復
動宜乘勢先擊蓋吳今軍往一日便到平蓋吳之後迴

向長安亦一日而至一日之內未便損傷愚謂宜從北道若從南道則蓋吳徐入北山卒未可平帝不從乃度渭南蓋吳聞帝至盡散入北山果如浩言軍無所尅帝悔之後以浩輔東宮之勤賜繒絮布帛各千段太武蒐於河西詔浩詣行在所議軍事浩表猶如前議以謂漢武患匈奴彊盛故開涼州五郡通西域廣農積穀為滅賊之資東西迭擊故漢未疲而匈奴已弊今募徙豪彊大家充實涼土軍舉之日東西齊勢此計之得者浩又

上五寅元厯表曰太宗即位元年勅臣解急就章孝經論語詩尚書春秋禮記周易三年成訖復詔臣學天文星厯易式九宮無不盡看三十九年晝夜無廢臣稟性弱劣力不及健婦人更無餘能是以專心思書忘寢與食至乃夢共鬼爭義遂得周公孔子之要術始知古人有虛有實妄語者多真正者少自秦始皇焚書之後經典絕滅漢高祖以來世人妄造厯術者十餘家皆不得天道之正大誤四千小誤甚多不可言盡臣愍其如此

今遭陛下太平之世除偽從真宜改誤歷以從天道是以臣前奏造歷今始成訖謹以奏呈惟垂恩省察以臣歷術宣示中書博士然後施用非但時人天地鬼神知臣得正可以益國家萬世之名過於三皇五帝矣浩又以晉書諸家並多誤著晉後書未就傳世者五十餘卷初道武詔祕書郎鄧淵著國記十餘卷編年次事體例未成逮於明元廢而不述神䴥二年詔集諸文人摭錄國書浩及弟覽高讜鄧穎鼂繼范享黃輔等共參著作

叙成國書三十卷著作令史太原閔湛趙郡郗標素詒
事浩乃請立石銘刊載國書以彰直筆并勒浩所注五
經浩贊成之景穆善焉遂營於天郊東三里方百步用
功三百萬乃訖浩所著國記盡述國事備而不典而石
銘顯在衢路北人咸悉忿毒相與譖浩於帝帝大怒使
有司按浩取祕書郎史及長厯生數百人意狀浩服受
賊太平真君十一年六月誅浩清河崔氏無遠近及范
陽盧氏太原郭氏河東柳氏皆浩之姻親盡夷其族其

祕書郎史已下盡死浩始弱冠太原郭逸以女妻之浩晚成不曜華采故時人未之知也逸妻王氏即宋鎮北將軍王仲德姊也每奇浩才能自以為得佳婿俄而女亡王氏深以傷恨復以少女繼婚逸及親屬以為不可王氏固執與之逸不能違遂重結好浩非毀佛法而妻郭氏好釋典時時讀誦浩怒取而焚之捐灰於廁中及浩幽熱系置之檻內送於城南使衛士數十人溲其上呼聲噭噭聞於行路自宰司之被戮辱未有如浩者世皆

以為報應之驗也初浩之害李順基萌已成夜夢秉火
爇順寢室火作而順死浩與室家羣立而觀之俄而順
弟急號哭而出曰此輩吾賊也以戈擊之悉投於河寤
而惡之以告館客馮景仁景仁曰此真不善也非復虛
事夫以火爇人暴之極也且兆始惡者有終殃積不善
者無餘慶厲階成矣公其圖之浩曰吾方思之而不能
悛至是而族浩既工書人多託寫急就章從少至老初
不憚勞所書蓋以百數必稱為代疆以示不敢犯國其

謹也如此浩書體勢及其先人而妙巧不如也世寶其
述多裁割綴連以為模楷浩母盧謐孫女也浩著食經
序曰余自少及長耳目聞見諸母諸姑所修婦功無不
蘊習酒食朝夕養舅姑四時供祭祀雖有功力不任僮
使常手自親焉昔遭喪亂饑餓仍臻饋疏餉口不能具
其物用十餘年間不復備設先妣慮久廢忘後生無所
知見而少不習書乃占授為九篇文辭約舉婉而成章
聽辯彊記皆此類也親沒之後遇國龍興之會平暴除

亂拓定四方余備位台鉉與參大謀賞獲豐厚牛羊益
澤貲累鉅萬衣則重錦食則粱肉遠惟平生季路負米
之時不可復得故序遺文垂示來世浩弟簡字仲亮一
名覽好學少以善書知名道武初歷中書侍郎爵五等
侯參著作事卒簡弟恬字叔元小名白位豫州刺史爵
武陽侯坐浩伏誅宏祖悅與范陽盧諶並以博藝齊名
諶法鍾繇悅法衛瓘而俱習索靖之草皆盡其妙諶傳
子偃偃傳子邈悅傳子潛潛傳子宏世不替業故魏初

重崔盧之書宏自非朝廷文誥四方書檄初不妄染故
世無遺文尤善草隸為世摹楷行法特盡精巧而不見
遺迹始宏因苻氏亂欲避地江南為張願所獲本圖不
遂乃作詩以自傷而不行於世蓋懼罪也浩誅中書侍
郎高允受勅收浩家書始見此詩允知其意允孫綽錄
於允集初宏父潛為兄渾等誣手筆本草延昌初著作
佐郎王遵業買書於市遇得之年將二百寶其書迹深
藏祕之武定中遵業子松年將以遺黃門郎崔季舒人

多摹搨之左光祿大夫姚元擲以工書知名於時見潛
書以為過於浩也宏弟徽字元猷少有文才與渤海高
演俱知名厯位祕書監賜爵貝丘侯樂安王範鎮長安
選舊德之士與俱範以徽為平西將軍副將行樂安王
傳進爵濟南公徽為政務存大體不親小事性好人倫
引接賓客或談及平生或講論道義誨謗後進終日不
止以疾徵還京師卒謚曰元公士類無不歎息始清河
崔寬祖彤隨晉南陽王保避地隴右遂仕西涼及沮渠

氏彤生剖字伯宗每慷慨有懷東土常歎曰風雨如晦
雞鳴不已吾所庶幾及太武西巡剖乃總率同義使子
寬送款太武嘉之拜寬歧陽令賜爵延水男遣使與寬
俱西撫慰初附徵剖詣京師未至而卒文成以剖誠著
先朝贈涼州刺史武陵公謚曰元寬字景仁還京封安
國子位弘農太守初寬通款見浩浩與相齒次厚存接
之及浩誅以遠來疎族獨得不坐遂家于武城居司空
林舊墟以一子繼浩與浩弟覽妻封氏相奉如親寬後

襲爵武陵公陝城鎮將三靖地險人多劫寇而寃性滑
稽誘接豪右宿盜魁帥與相交結傾衿待遇不逆細微
莫不感其意氣時官無祿力唯取給於人寃善撫納招
致禮遺大有取受而與之者無恨又弘農出漆蠟竹木
之饒路與南通貿易來往家產豐富而百姓樂之諸鎮
之中號曰能政及解鎮人人追戀詣闕上疏者三百餘
人卒遺言薄葬斂以時服長子衡字伯玉少以孝行著
稱學崔浩書頗亦類焉天安元年擢為內祕書中散班

下詔命及御所覽書多其迹也衡舉李冲李元愷程駿等終為名器承明元年遷內都坐令善折獄孝文嘉之太和二年襲爵武陵公衡涉獵書史頗為文筆蠕蠕時犯塞衡上疏陳備禦之方便國利人之策凡五十餘條除秦州刺史徙爵齊郡公先是河東年饑劫盜大起衡至修糞遂法勸課農桑周年間寇盜止息卒贈冀州刺史謚惠公衡五子長子敞字公世襲爵例降為侯為平原相敞性狷急與刺史楊椿迭相表列敞坐免官宣武

初為鉅鹿太守弟朏之逆敞為黃太軍主韓文殊所藏
其家悉見籍沒唯敞妻李氏以公主之甥自隨奴婢田
宅二百餘口得免正光中普釋禁錮敞復爵郡侯卒於
趙郡太守敞弟鍾字公祿奉朝請弟朏之逆以出後被
原厯司徒右長史金紫光祿大夫冀州大中正敞亡後
鐘貪其財誣敞息子積等三人非兄允辭訴累世人士
嫉之爾朱世隆為尚書令奏除其官終身勿齒朏好學
有文才為京兆王愉錄事參軍與愉同逆伏法宏同郡

董謐謐父京與同郡崔康時霍原等俱以碩學播名遼海謐好學傳父業中山平入朝拜儀曹郎撰朝覲饗宴郊廟社稷之儀

張袞字洪龍上谷沮陽人也祖翼遼東太守父卓昌黎太守袞篤實好學有文才初為郡五官掾道武為代王選為左長史從道武征蠕蠕追之五六百里諸部帥因袞言糧盡不宜深入帝問袞若殺副馬足三日食乎皆言足也帝乃倍道追之及於廣漠赤地南林山下大破

之既而帝問袞卿曹外人知我問三日糧意乎對曰皆
莫知也帝曰此易知耳蠕蠕奔走數日畜產失飲至水
必留計其道程三日足及輕騎卒至出其不意彼必驚
散其勢然矣袞以帝言出告部帥咸曰聖策長遠非愚
近所及袞常參大謀決策帷幄帝器之禮遇優厚袞每
告人曰昔樂毅杖策於燕昭仲達委身於魏武蓋命世
難可期千載不易遇主上天姿傑邁逸志陵霄必能囊
括六合混一四海夫遭風雲之會不建騰躍之功者非

人豪也遂策名委質竭誠伏事時劉顯地廣兵彊跨有
朔裔會其兄弟乖離共相疑阻袞言於道武曰顯志大
意高今因其內豐宜速乘之帝從之遂破走顯又從破
賀訥道武登勿居山遊宴從官請聚石為峯以記功德
乃命袞為文慕容寶之來寇也袞言於帝曰寶乘滑臺
之功因長子之捷傾資竭力難與爭鋒愚以為宜羸師
卷甲以侈其心帝從之果破之參合皇始初遷給事黃
門侍郎道武南伐師次中山袞言於帝曰寶憑三世之

資城池之固雖皇威震赫勢必擒殄然窮兵極武非王者所宜若酈生一說田橫委質魯連飛書聊將授首臣誠德非古人略無奇策仰憑威靈庶必有感袞乃遣寶書喻以成敗寶見書大懼遂奔和龍既克中山聽入八議拜奮武將軍幽州刺史賜爵臨渭侯袞清儉寡欲勸課農桑百姓安之天興初徵還京師後與崔逞荅晉將郗恢書失旨黜為尚書令史袞遇創業之初始以才謨見任率心奉上不顧嫌疑帝曾問南州人於袞袞與盧

溥州里數稱薦之又未嘗與崔逞相見聞風稱美及中山平盧溥聚黨為逆崔逞答書不允並乖本言故忿之衰年過七十閨門守靜手執經書刊定乖失愛好人物善誘無倦士類以此高之永興二年疾篤上疏後數日卒年七十二太武後追錄舊勲遣大鴻臚即袞墓冊贈太保謚文康公子度少有學尚襲爵臨渭侯卒於中都大官度子白澤年十一遭母憂以孝聞長而博學文成初除殿中曹給事中甚見寵任白澤本名鍾葵獻文賜

名白澤納其女為嬪出行雍州刺史清心少欲民吏安
之獻文詔諸監臨官取所監羊一口酒一斛者罪至大
辟與者以從坐論糾得尚書以下罪狀者各隨所糾官
輕重而授之白澤以為此法若行之不已恐姦人窺望
勞臣解節請依律令舊法獻文納之太和初懷州人伊
祁苟初三十餘人謀反文明皇太后欲盡誅一城人白
澤諫以為周書父子兄弟罪不相及不誣十室而況一
州后從之乃止轉散騎常侍殿中尚書卒贈相州刺史

廣平公謚曰簡長子倫字天念大司農少卿燕州大中
正熙平中蠕蠕主醜奴遣使來朝抗敵國之禮不修臣
敬朝議將依漢荅匈奴故事遣使報之倫表以為虜雖
慕德亦來觀我懼之以彊儻或歸附示之以弱窺覬或
起春秋所謂以我卜也高祖世宗知其若此來既莫逆
去又不追必其委質玉帛之辰屈膝藩方之禮則豐其
勞賄藉以珍物至於王人遠役銜命虜庭優以匹敵之
尊加之想望之寵恐徒生虜慢無益聖朝不從孝莊初

卒於大司農卿袞弟恂列在循吏傳

鄧淵字彥海安定人也祖羌苻堅車騎將軍父翼河間相慕容垂之圍鄴以為冀州刺史爵真定縣侯翼拒對使者曰先君忠於秦室翼豈可先叛乎忠臣不事二主未敢聞命垂喻遣之曰吾與車騎結為異姓兄弟卿亦猶吾子弟安得辭乎翼曰冀州宜任親賢翼請他役効命垂乃用為河間太守後卒於趙郡內史淵性貞素言行可復博覽經書長於易筮道武定中原擢為著作郎

再遷尚書吏部郎淵明制度多識故事與尚書崔宏參
定朝儀律令音樂及軍國文記詔策多淵所為從征平
陽以功賜爵下博子加中壘將軍道武詔淵撰國記十
餘卷唯次年月起居行事而已未有體例淵謹於朝事
未嘗忤旨其從父弟暉時為尚書郎兇俠好奇與定陵
侯和跋厚跋有罪誅其子弟奔長安或告暉將送出之
由是道武疑淵知情遂賜淵死既而悔之時人咸愍惜
焉子穎襲爵稍遷中書侍郎太武詔太常卿崔浩集諸

文學撰述國書頴與浩弟覽等俱參著作事太武幸漠
南高車莫弗庫若干率騎數萬餘驅鹿百餘萬詣行所
詣頴為文銘於漠南以記功德兼散騎常侍使宋進爵
為侯卒謚曰文恭子怡襲爵位荊州刺史賜爵南陽公
卒子侍孝文賜名述位齊州刺史初改置百官始重公
府元佐以述為太傅元不長史卒於司空長史謚曰貞
長孫嵩代人也父仁昭成時為南部大人嵩寬雅有器
度昭成賜名焉年十四代父統事昭成末年諸部乖亂

苻堅使劉庫仁攝國事嵩與元他等率部衆歸之劉顯
之謀難也嵩率舊人及庶師七百餘家叛顯走將至五
原時寔君之子烏渥亦聚衆自立嵩欲歸之見烏渥烏
渥稱逆父之子勸嵩歸道武嵩未決烏渥迴其牛首嵩
勉從之見道武於三漢亭道武以為南部大人累著
軍功後從征中山除冀州刺史賜爵鉅鹿公歷侍中司
徒相州刺史改封南平公所在著稱明元即位與山陽
侯奚斤北新侯安同白馬侯崔宏等八人坐止車門右

聽理萬機故世號八公晉將劉裕之伐姚泓明元假嵩
節督山東諸軍事傳詣平原緣河北岸列軍次於畔城
軍頗失利詔假裕道裕於舟中望嵩麾蓋遺以酃酒及
江南食物嵩皆送京師詔嵩厚答之又勅簡精兵為戰
備若裕西過者便率精銳南出彭沛如不時過但引軍
隨之彼至崤陘間必與姚泓相持一死一傷衆力疲弊
比及秋月徐乃乘之則裕首可不戰而縣矣於是叔孫
建等尋河趣洛遂入關嵩與建等自成臯南濟晉諸屯

戊皆望塵奔潰裕尅長安嵩乃班師明元寢疾問後事
於嵩嵩曰立長則順以德則人服今長皇子賢而世嫡
天所命也請立乃定策詔太武臨朝監國嵩為左輔太
武即位進爵北平王司州中正詔問公卿赫連蠕征
討何先嵩與平陽王長孫翰司空奚斤等曰赫連土居
未能為患蠕蠕世為邊害宜先討大檀及則收其畜產
足以富國不及則校獵陰山多殺禽獸皮肉筋角以充
軍實亦愈於破一小國太常崔浩曰大檀遷徙鳥逝疾

追則不足經久大衆則不能及之赫連屈丐土宇不過
千里其刑政殘虐人神所棄宜先討之尚書劉絜武京
侯安原請先平馮跋帝默然遂西巡狩後聞屈丐死關
中大亂議欲征之嵩等曰彼若城守以逸待勞大檀聞
之乘虛而寇此危道也帝乃問幽微於天師寇謙之謙
之勸行杜超之贊成之崔浩又言西伐利嵩等固諫不
可帝大怒責嵩在官貪汚使武士頓辱尋遷太尉久之
加柱國大將軍自是輿駕征伐嵩以元老多留鎮京師

坐朝堂平斷刑獄薨年八十謚曰宣王後孝文追錄先朝功臣以嵩配饗廟庭子顏善騎射彎弓三百斤襲爵加侍中征南大將軍有罪黜為戍兵後復爵薨謚曰安王子敦字孝友位北鎮都將坐贖貨降為公孝文時自訟先世勲重帝復其王爵薨謚曰簡王子道字念僧襲爵久之隨例降為公位右衛將軍卒謚曰慎子悅襲爵建義初復本王爵尋降為公位光祿少卿卒贈司空嵩五世孫儉仕周知名有傳嵩從子道生忠厚廉謹道武

愛其謹重使掌機密與賀毗等四人內侍左右出入詔
命明元即位除南統將軍冀州刺史後取人美女以獻
明元切責之以舊臣不加罪黜太武即位進爵汝陰公
遷廷尉卿從征蠕蠕與尉眷等率衆出白黑兩漠間大
捷而還太武征赫連昌道生與司徒長孫翰宗正娥清
為前驅遂平其國昌弟定走保平涼宋遣將到彊之王
仲德寇河南以救定詔道生與丹陽王太之屯河上以
禦之遂誘宋將檀道濟邀其前後追至厯城而還除司

空加侍中進封上黨王薨年八十二贈太尉謚曰靖道
生廉約身為三司而衣不華飾食不兼味一熊皮障泥
數十年不易時人比之宴嬰第宅卑陋出鎮後其子弟
頗更修繕起堂廡道生還歎曰昔霍去病以匈奴未滅
無用家為今彊寇尚游魂漠北吾豈可安坐華美也乃
切責子弟令毀其宅太武世所在著績每建大議多合
時機為將有權略善待士衆帝命歌工歷頌羣臣曰智
如崔浩廉如道生及年老頗惑其妻孟氏以此見譏與

從父嵩俱為三公當世以為榮子抗位少府卿早卒抗
子觀少以壯勇知名後襲祖爵上黨王時異姓諸王襲
爵多降為公帝以其祖道生佐命先朝故特不降以征
西大將軍假司空督河西七鎮諸軍討吐谷渾部帥拾
寅拾寅遁藏焚其城邑而還孝文初拜殿中尚書侍中
吐谷渾又侵逼復假觀司空討降之後為征南大將軍
薨謚曰定葬禮依其祖靖王故事陪葬雲中金陵子冀
歸六歲襲爵降為公孝文以其幼承家業賜名幼字承

業承業聰敏有才藝虛心愛士為前將軍從孝文南討
宣武時為揚州刺史假鎮南大將軍都督淮南諸軍事
梁將裴邃虜鴻襲據壽春承業諸子驍果邃頗難之號
曰鐵小兒詔河間王琛總衆援之琛欲決戰承業以雨
久更須持重琛弗從遂戰為賊所乘承業後殿初承業
既總彊兵久不決戰議者疑有異圖朝廷重遣河間王
琛及臨淮王或尚書李憲等三都督外聲助承業內實
防之會鮮于修禮反於中山以承業為大都督北討尋

以本使達鄴城詔承業解行臺罷大使遣河間王琛為
大都督酈道元為行臺承業遣子子裕奉表稱與琛同
在淮南俱當國難琛敗臣全遂生私隙且臨機奪帥非
策所長書奏不納琛與承業前到呼沱承業未欲戰而
琛不從行達五鹿為修禮邀擊琛不赴之賊總至遂大
敗承業與琛並除名尋而正平蜀郡反復假承業鎮西
將軍討蜀都督頻戰有功除平東將軍復本爵後除尚
書右僕射未幾雍州刺史蕭寶夤據州反復以承業為

行臺討之承業時背疽未愈靈太后勞之曰卿疹源如此朕欲相停更無可寄如何承業答曰死而後已敢不自力時子彥亦患脚痺扶杖入辭尚書僕射元順顧相謂曰吾等備為大臣各居寵位危難之日病者先行無乃不可乎莫有對者時薛鳳賢反於正平薛修義屯聚河東分據鹽池攻圍蒲坂東西連結以應寶夤承業乃據河東時有詔廢鹽池稅承業上表曰鹽池天資賄貨密邇京畿唯須寶而護之均贍以理今四境多虞府庫

罄竭然冀定二州且亡且亂常調之絹不可復收仰惟
府庫有出無入必須經綸出入相補略論鹽稅一年之
中準絹而言猶不應減三十萬疋也便是移冀定二州
置於畿甸今若廢之事同再失臣前仰違嚴旨而先討
關賊徑解河東者非是閑長安而急蒲坂蒲坂陷沒失
鹽池三軍口命濟贍理絕天助大魏茲計不爽昔高祖
昇平之年無所乏少猶創置鹽官而加典護非為物而
競利恐由利而亂俗也況今王公素餐百官戶祿租徵

是願言事不獲已臣輒符司監將尉還率所部依常收
稅更聽後勅及雍州平除雍州刺史孝莊初封上黨王
尋改馮翊王後降為郡公遷司徒公加侍中兼尚書令
大行臺仍鎮長安節閔立遷太尉公錄尚書事及韓陵
之敗斛斯椿先據河橋謀誅爾朱使承業入洛啓節閔
誅世隆兄弟之意孝武初轉太傅以定策功更封開國
子承業表請迴授其姨兄廷尉卿元洪超次子憲初承

業生而母亡為洪超母所撫養是以求讓許之孝武入
關承業時鎮虎牢亦隨赴長安位太師錄尚書事封上
黨王大統元年薨贈假黃鉞大丞相都督三十州諸軍
事雍州刺史謚曰文宣承業少輕俠鬪雞走馬力爭殺
人因亡抵龍門將陳興德家會赦得免因以後妻羅前
夫女呂氏妻興德兄興恩以報之羅年大承業十餘歲
酷妬忌承業雅相敬愛無姬妾童侍之中在承業左右
嫌疑致死者乃有數四前妻張氏二子子彥子裕羅生

三子紹遠士亮季亮兄弟皆雄武子彥本名雋有膂力
以累從父征討功封槐里縣子孝武帝與齊神武構隙
加子彥中軍大都督行臺僕射鎮弘農以為心膂及從
帝入關封高平郡公位儀同三司以從征竇泰戰沙苑
功加開府侍中及東復舊京以子彥兼尚書令行司州
牧留鎮洛陽後以不利班師大統七年拜太子太傅子
彥少嘗墜馬折臂肘上起骨寸餘乃命開內鋸骨流血
數升言戲自若時以為踰於關羽末年石發舉體生瘡

雖親戚兄弟以為惡疾子彥曰惡疾如此難以自明世無良醫吾其死矣嘗聞惡疾蝮蛇螫之不痛試為求之當令兄弟知我乃於南山得蛇以股觸之痛楚號叫俄而腫死文帝聞之慟哭曰失我良將贈雍州刺史子裕位衛尉少卿啟捨汎階十七級為子義貞求官除左衛將軍加通直散騎常侍又以父勲封平原縣侯抗弟禮少以父任為散騎侍郎與襄城公盧魯元等內侍恭敏有才志太武寵信之曰其父親近吾祖其子在我左右

不亦宜乎

長孫肥代人也昭成時年十三以選內侍少有雅度果毅少言道武之在獨孤及賀蘭部常從禁侮左右帝深信仗之登國初與莫題等俱為大將屢有軍功後從平中山以功賜爵琅邪公遷衛尉卿改爵盧鄉時中山太守仇儒不樂內徙亡匿趙郡推趙淮為主妄造祆言云燕東傾趙當續欲知其名淮水不足淮喜而從之自號鉅鹿公儒為長史據關城連引丁零殺害長吏肥討破

准於九門斬仇儒禽准詔以儒肉食准傳送京師輶之
於市夷其族除肥兗州刺史姚平之寇平陽道武徵肥
與毗陵王順等為前鋒平退保柴壁帝進攻屠之遣肥
還鎮兗州撫慰河南威信著於淮泗肥善策謀勇冠諸
將前後征討未嘗失敗故每有大難令肥當之南平中
原西摧羌寇肥功居多賞賜千計後降爵藍田侯卒謚
曰武陪葬金陵子翰襲爵翰少有父風道武時以善騎
射為獵郎明元之在外翰與元磨渾等潛謀奉迎明元

即位與磨渾等拾遺左右以功累遷平南將軍率衆鎮
北境威名甚著太武即位封平陽王蠕蠕大檀之入寇
雲中太武親征之遣翰與東平公娥清出長川討大檀
大檀北遁追擊尅獲而還遷司徒從襲赫連昌破之翰
清正嚴明善撫將士薨太武為之流涕親臨其喪喪禮
依安成王叔孫俊故事謚曰威陪葬金陵子成襲爵降
為公位南部尚書卒陪葬金陵翰弟陵位駕部尚書性
寬厚好學愛士封吳郡公卒贈吳郡王謚曰恭陪葬金

陵

于栗磾代人也少習武藝材力絕人能左右馳射登國中拜冠軍將軍假新安子與寧朔將軍公孫蘭潛自太原從韓信故道開井陘關路襲慕容寶於中山道武後至見道路修治大悅賜以名馬及趙魏平帝置酒高會謂栗磾曰卿吾之黥彭也進假新安公道武田於白登山見熊將數子顧謂栗磾曰卿勇幹如此能搏之乎對曰天地之性人為貴若搏之不勝豈不虛斃一壯士自

可驅致御前坐而制之尋皆禽獲帝顧謝之後為河內
鎮將劉裕之伐姚泓也栗磾慮裕侵擾河北築壘河上
裕憚之遺栗磾書假道西上題曰黑矟公麾下栗磾以
狀表聞明元因之授栗磾黑矟將軍栗磾好持黑矟裕
望而異之故有其號也永興中關東羣盜大起西河反
叛栗磾受命征伐所向皆平遷豫州刺史進爵新安侯
洛陽雖歷代所都實為邊界栗磾安集之甚得百姓歡
心明元南幸孟津謂栗磾曰河可橋乎栗磾曰杜預造

橋遺事可想而知乃編次大船為橋於野坂六軍既濟帝深歎美之太武之征赫連昌勅栗磾與宋兵將軍周幾襲陝城長驅至三輔進爵為公累遷外都大官平刑折獄甚有聲稱卒年七十五賜東園祕器朝服一具衣一襲贈太尉栗磾自少總戎迄於白首臨事善斷所向無前加以謙虛下士刑罰不濫太武甚悼惜之子洛拔有姿容善應對拜侍御中散太武甚加愛寵因賜名焉轉監御曹令景穆在東宮厚加禮遇洛拔恒畏避屏退不敢

逆自結納頃之襲爵後為侍中尚書令百僚憚之卒於官洛拔有六子長子烈善射少言有不可犯之色少拜羽林中郎累遷侍中殿中尚書於時孝文幼冲文明太后稱制烈與元丕陸叡李沖等各賜金策許以有罪不死進爵洛陽侯轉衛尉卿及遷都洛陽人情戀本多有異議帝以問烈烈曰陛下聖略深遠非愚管所測若隱心而言樂遷之與戀舊中半耳帝曰卿不唱異同朕深感不言之益勅鎮代留臺庶政一相參委車駕幸代執

烈手曰宗廟至重翼衛不輕卿當祇奉靈駕時遷洛邑
烈與高陽王雍奉神主於洛陽遷光祿卿十九年大選
百僚子登引例求進烈表引已素無教訓請乞黜落帝
曰此乃有識之言不謂烈能辦此乃引見登詔曰朕今
創禮新邑明揚天下卿父乃行謙讓之表而有直士之
風故進卿為太子翊軍校尉又加烈散騎常侍封聊城
縣子及穆泰陸叡謀反舊京帝幸代秦等伏法賜烈及
李沖璽書述叙金策之意時代卿舊族同惡者多唯烈

一宗無所染豫帝益器重之歎曰元儼決斷威恩深自不惡然盡忠猛決不如烈也爾日烈在代都必即斬其五王元首烈之節槩不謝金日磾詔除領軍將軍以本官從征荆沔加鼓吹一部二十三年齊將陳顯達入寇馬圈帝輿疾討之執烈手以京邑為託帝崩於行宮彭城王勰祕諱而返稱詔召宣武會駕魯陽以烈留守之重密報凶問烈處分行留神色無變宣武即位寵任如前咸陽王禧為宰輔權重當時曾遣家僮傳言於烈求

舊羽林虎賁執仗出入烈不許禧遣謂烈曰我是天子兒天子叔元輔之命與詔何異烈厲色答曰向亦不道王非天子兒叔若是詔應遣官人所由若遣私奴索官家羽林烈頭可得羽林不可得也禧惡其剛直出之為恒州刺史烈不願蕃授謂彭城王勰曰殿下忘先帝南陽之詔乎而逼老夫乃至於此遂以疾辭宣武以禧等專擅潛謀廢之景明二年正月初祭三公致齋於廟帝夜召烈子忠謂曰卿父明可早入及明烈至詔曰諸父

怠慢今欲使卿以兵召之卿其行乎烈曰老臣厯奉累
朝頗以幹勇賜識今日之事所不敢辭乃將直閣以下
六十餘人宣旨召咸陽王禧彭城王勰北海王詳衛送
至帝前諸公各稽首歸政以烈為領軍進爵為侯自是
長直禁中機密大事皆所參焉咸陽王禧之謀反宣武
從禽於野左右分散倉卒之際莫知其計乃勅烈子忠
馳覘虛實烈時留守已處分有備因忠奏曰臣雖朽邁
心力猶可禧等猖狂不足為慮願緩蹕徐還以安物望

帝甚以為慰車駕還宮禧已逃詔烈追執之順后既立
以世父之重彌見優禮及卒宣武舉哀於朝堂給東園
第一祕器贈太尉鉅鹿郡公子祚襲祚弟忠字思賢本
字千年弱冠拜侍御中散文明太后臨朝刑政頗峻侍
臣左右多以微譴得罪忠朴直少言終無過誤太和中
授武騎侍郎因賜名登累遷左中郎將領直寢元禧之
亂車駕在外變起倉卒忠曰臣父為領軍計必無慮帝
遣忠馳觀之烈嚴備果如所量忠還宣武撫其背曰卿

差彊人意先帝賜卿名登誠為美稱朕嘉卿忠款今改
名忠既表貞固之誠亦以名實相副也以父憂去職徙
為司空長史時太傅錄尚書北海王詳親尊權重將作
大匠王遇多隨詳所欲而給之忠於詳前謂遇曰殿下
國之周公阿衡王室何至阿諛附勢損公惠私也遇既
不寧詳亦慙謝以平元禧功封魏郡公及遷散騎常侍
兼武衛將軍每以鯁氣正辭為北海所忿面責忠曰我
憂在前見爾死不憂爾見我死時也忠曰人生自有定

分若應死王手避亦不免不爾王不能殺詳因忠表讓
之際密勸帝以忠為列卿於是詔停其封優進太府卿
正始二年詔忠以本官使持節兼侍中為西道大使刺
史鎮將贓罪顯暴者以狀聞守令以下便行決斷與尚
書李崇分使二道忠劾并州刺史高聰贓罪二百餘條
論以大辟除華州刺史遭繼母憂不行服闋再遷衛尉
卿河南邑中正忠與吏部尚書元暉度支尚書元匡河
南尹元萇等推定代方姓族高肇忌其為人乃言於宣

武稱中山要鎮作捍須才乃出忠為定州刺史既而帝
悔復授衛尉卿領左將軍恒州大中正密遣使詣忠慰
勉之延昌初除都官尚書領左衛中正如故又加散騎
常侍嘗因侍宴賜之劍杖舉酒屬忠曰卿世執貞節故
恒以禁衛相委昔以卿行忠賜名曰忠今以卿才堪禦
侮以所御劍杖相錫循名取義意在不輕出入恒以自
防也遷侍中領軍將軍忠辭無學識宣武曰學識有文
章者不少但心直不如卿欲使卿劬勞於下我當無憂

於上及帝崩夜忠與侍中崔光遣右衛將軍侯剛迎明
帝於東宮而即位忠與門下議以帝沖年未親機政太
尉高陽王雍屬尊望重宜入居西柏堂省決庶政任城
王澄明德茂親可為尚書令總攝百揆奏中宮請即勅
授御史中尉王顯欲逞姦計與中常侍給事中孫蓮等
厲色不聽寢門下之奏孫蓮等密欲矯太后令以高肇
錄尚書事顯與高猛為侍中忠即殿下收顯殺之忠既
居門下又總禁衛遂執朝政權傾一時初太和中軍國

多事孝文以用度不足百官祿四分減一忠既擅朝欲
以惠澤自固乃悉復所減之祿職人進位一級舊制百
姓絹布一疋之外各輸綿麻八兩忠悉以與之乃白高
陽王雍自云宣武本許優轉雍憚忠威權便順意加忠
車騎大將軍忠自謂新故之際有安社稷功諷百寮令
加己賞太尉清河王懌廣平王懷難違其意封忠恒山
郡公忠又難於獨受乃諷朝廷同在門下者並加封邑
尚書左僕射郭祚尚書裴植以忠權勢日盛勸雍出忠

忠聞之逼有司誣奏其罪祚有師傅舊恩植擁地入國
忠並矯詔殺之朝野憤忿無不切齒王公以下畏之累
跡又欲殺高陽王雍侍中崔光固執乃止遂免雍太尉
以王還第自此詔命生殺皆出於忠既尊靈太后為皇
太后居崇訓宮忠為儀同三司尚書令崇訓衛尉侍中
領軍如故靈太后臨朝解忠侍中領軍崇訓衛尉止為
儀同尚書令侍中忠為令旬餘靈太后引門下侍官問
忠在端右聲聽咸曰不稱厥任乃出為冀州刺史太傅

清河王等奏忠擅殺樞納輒廢宰輔朝野駭心遠近怪
愕功過相除悉不合賞請悉追奪靈太后從之熙平元
年御史中尉元匡奏忠以鴻勳盛德受遇累朝幸國大
災專擅朝命無人臣之心裴郭受寃於既往宰輔黜辱
於明世又自矯旨為儀同三司尚書令領崇訓衛尉原
其此意便欲無上自處既事在恩後宜加顯戮請遣御
史一人令史二人就州行決靈太后令以忠事經肆眚
遂不追罪又詔以忠歷任禁要誠節皎然賜爵靈壽縣

公初宣武崩後高太后將害靈太后劉騰以告侯剛剛
以告忠忠請計於崔光光曰宜置胡嬪於別所嚴兵守
衛忠從之具以此意啓靈太后太后意乃安故太后深
德騰等四人並有寵授忠以毀之者多懼不免禍願還
京欲自營救靈太后不許二年四月除尚書右僕射加
侍中將軍如故神龜元年三月復儀同三司疾未拜見
裴郭為祟自知必死先表養亡弟第二子司徒掾永超
為子乞以為嫡靈太后許之薨贈司空有司奏太常少

卿元端議案謚法剛彊正直曰武怙威肆行曰醜宜謚
武醜公太常卿元修義議忠盡心奉上剪除凶逆依謚
法除偽寧真曰武夙夜恭事曰敬宜謚武敬公二卿不
同靈太后令依正卿議忠性多阻忌不交勝已唯與直
閣將軍章初瓊千牛備身楊保元為斷金之交李世哲
求寵於忠私以金帛貨初瓊保元二人談之遂被賞愛
以為腹心忠擅權昧進為崇訓之由皆世哲計也忠弟
景字百年忠薨後為武衛將軍謀廢元义义黜為懷荒

鎮將及蠕蠕主阿那瓌叛鎮人請糧景不給鎮人遂執
縛景及其妻拘守別室皆去其衣服令景著皮裘妻著
故絳旗襖毀辱如此月餘乃殺之烈弟果嚴毅直亮有
父兄風厯朔華并恒四州刺史賜爵武城子果弟勁勁
字鐘葵頗有武略位沃野鎮將賜爵富昌子宣武納其
女為后封勁太原郡公妻劉氏為章武郡君後為征北
將軍定州刺史卒贈司空謚曰恭莊公自栗磾至勁累
世貴盛一皇后四贈公三領軍二尚書令三開國公勁

雖以后父但以順后且崩竟不居公輔子暉字宣明后母弟也少有氣幹襲爵位汾州刺史暉善事人為爾朱榮所親以女妻其子長儒歷侍中河南尹後兼尚書僕射東南道行臺與齊神武討平羊侃於兗州元顥入洛害之勁弟天恩位內行長遼西太守贈平東將軍燕州刺史天恩子仁生位太中大夫仁生子安定平原郡太守高平郡都將安定子子提隴西郡守茂平縣伯周保定二年以子謹著勲追贈太保建平郡公謹自有傳

崔逞字叔祖清河東武城人魏中尉琰之五世孫也曾
祖諒晉中書令祖遇仕石氏為特進父瑜黃門郎逞少
好學有文才仕慕容暐補著作郎撰燕記遷黃門侍郎
暐滅苻堅以為齊郡太守堅敗仕晉歷清河平原二郡
太守為翟遼所虜以為中書令慕容垂滅翟釗以為祕
書監慕容寶東走和龍為留臺吏部尚書及慕容麟立
逞攜妻子歸魏張袞先稱美之由是道武禮遇甚厚拜
尚書錄三十六曹別給吏屬居門下省尋除御史中丞

道武攻中山未克六軍乏糧問計於逞逞曰飛鶴食甚而改音詩稱其事可取以助軍糧帝雖銜其侮慢然兵既須食乃聽人以甚當租逞又言可使軍人及時自取過時則落盡帝怒曰內賊未平兵人尚可解甲收甚乎以中山未拔故不加罪及姚興侵晉襄陽戍將郗恢馳使乞師於恒山王遵書云賢兄虎步中原道武以為悖君臣之體勅逞與張袞為遵書答使亦貶其主號以報之逞袞為書乃云貴主帝怒其失旨黜袞遂賜逞死後

晉荊州刺史司馬休之等數十人為桓玄所逐皆將來
奔至陳留聞逞被殺分為二輩一奔長安一奔廣固帝
聞深悔自是士人有過多見優容逞子諶毅禕嚴頤初
逞之內徙終慮不免乃使其妻張氏與四子歸慕容德
於廣固獨與小子頤在代京及逞死亦以此為譴頤字
太沖位散騎常侍賜爵清河侯太武聞宋以其兄諶為
冀州刺史乃曰義隆用其兄我豈無冀州地邪乃以頤
為冀州刺史入為大鴻臚持節策拜楊難當為南秦王

奉使數返光揚朝命太武善之後與方士韋文秀詣王屋山造金丹不就太平真君初卒始崔浩與頤及崇陽太守模等年皆相次浩為長次模次頤三人別祖而模頤為親浩恃其家世魏晉公卿常侮模浩不信佛道模深所歸向雖糞壤中禮拜形像浩大笑曰持此頭顱不淨處跪是胡神也模嘗謂人曰桃簡可欺我何容輕我周兒也浩小名桃簡頤小名周兒太武頤聞之故浩誅二家獲免頤五子少子獻以交通境外伏誅自逞之死

至獻之誅三世積五十餘年在北一門盡矣諲仕宋位
青冀二州刺史諲子靈和宋員外散騎侍郎靈和子宗
伯始還魏追贈清河太守宗伯子休字惠盛休少孤貧
矯然自立舉秀才入京師與宋弁邢巒雅相知友尚書
王嶷欽其人望為長子聘休姊贍以財貨由是少振孝
文納休妹為嬪頻遷兼給事黃門侍郎休勤學公事軍
旅之隙未嘗釋卷禮遇亞於宋弁郭祚孝文南伐以北
海王詳為尚書僕射統留臺事以休為尚書左丞詔以

北海年少百揆務殷便以委休轉長史兼給事黃門侍郎參定禮儀帝嘗閱故府得舊冠題曰南部尚書崔逞制顧休曰此卿家舊事也後從駕南行及還幸彭城汎舟泗水詔在侍筵觀者榮之宣武初休以祖父未葬弟夤又亡固求出為渤海太守性嚴明雅長政體下車先戮豪猾數人姦盜莫不禽翦清身率下部內安之時大儒張吾貴名盛山東弟子恒數千人所在多不見容休招延禮接使肄業而還儒者稱為口實入為吏部郎中

遷散騎常侍權兼選任多所拔擢廣平王懷數引談宴
以與諸公交游免官後為司徒右長史公平清潔甚得
時譽歷幽青二州刺史皆以清白稱二州懷其德澤入
為度支七兵殿中三尚書休久在臺閣明習典故每朝
廷疑議咸取正焉諸公咸謂崔尚書下意處不可異也
卒贈尚書右僕射謚曰文貞休少而謙退事母孝謹及
為尚書子仲文娶丞相高陽王雍女女適元義庶長子
舒挾二家勢志氣微改陵藉同列尚書令李崇左僕射

蕭寶夤右僕射元欽皆以此憚下之始休母房氏欲以
休女妻其外孫邢氏休乃違母情以妻义子論者非之
休子㥄知名列在齊史休弟夤字敬禮位太子舍人卒
贈樂安太守妻樂安王長女晉寧公主也貞烈有德行
子愍字長謙幼聰敏濟州刺史盧尚之欲以長女妻之
㥄為長謙求尚之次女曰家道多由婦人欲令姊妹為
妯娌尚之感其義於是同日成婚休誠諸子曰汝等宜
皆一體勿作同堂意若不用吾言鬼神不享汝祭祀休

亡枕中有書如平生所識諸子奉焉長謙與休第二子仲文同年而月長其家謂之大二小二長謙少與太原王延業俱為著作佐郎監典校書後為青州司馬賊圍城二百日長謙讀書不廢凡手抄八千餘紙天文律歷醫方卜相風角鳥言靡不閑解晚節頗以酒為捐遷司徒諮詢修起居注加金紫光祿大夫後兼散騎常侍使梁將行謂人曰我尼在吳國忌在酉年今恐不免及還未及境卒年二十八贈南青州刺史逞兄適字寧祖亦

有名於時為慕容垂尚書左丞范陽昌黎二郡太守適
曾孫延壽冀州主簿輕財好施甚收鄉曲譽延壽子隆
宗簡率友弟居喪以孝聞仕蘭陵燕二郡太守仁信待
物檢復至誠故見重於時卒贈齊州刺史謚曰孝子敬
保冀州儀同府中郎卒贈冀州刺史敬保子子恒位魯
郡太守早卒子恒弟子安子昇武定中連元謹事伏誅
逞宗人模字思範琰兄霸之後也父遵慕容垂少府卿
模仕宋為滎陽太守神麌中平滑臺歸降後賜爵武城

男模長者篤厚不營榮利雖為崔浩輕侮而不為浩屈
與崔頤相親往來如一家始模在南妻張氏有二子仲
智季柔模至京師賜妻金氏生子幼度仲智等以父隔
遠乃聚貨規贖之其母張曰汝父志懷無決必不能來
行人以賄至都模果顧念幼度等指謂行人曰何忍捨
此輩致為刑辱當為爾取一人使名位不減我乃授以
申謨宋東郡太守也神麌中被執賜妻生子靈授申謨
聞變乃棄妻子走還江外靈授刑為閻人初太平真君

末模兄協子袞利為宋魯郡太守以郡降賜爵臨淄子
拜廣寧太守卒袞利二子懷順次恩仍居宋青州懷順
以父入魏故不仕及魏克青州懷順迎袞利喪還青州
云

王憲字顯則北海劇人也其先姓田秦始皇滅齊田氏
稱王家子孫因以為氏仍居海岱祖猛仕苻堅位丞相
父休河東太守憲幼孤隨伯父永在鄴苻丕稱尊號復
以永為丞相永為慕容垂所殺憲奔清河匿於民家皇

始中乃歸魏道武見之曰此王猛孫也厚待之以為本
州中正領選曹事兼掌門下太武即位行廷尉卿出為
上谷太守賜爵高唐子清身率下風化大行尋拜外都
大官復移中都歷仕二曹斷獄稱旨進爵劇縣侯出為
并州刺史加安南將軍進爵北海公境內清肅及還京
師以憲元老特賜錦繡布帛珍羞禮餧天安初卒年八
十九謚曰康子崇襲崇弟嶷字道長孝文初為南部尚
書在任十四年時南州多事訟者填門嶷性儒緩不斷

終日昏睡李訢鄧宗慶等號為明察而二人終見誅戮
餘十數人或出或免唯嶷卒得自保時人為之語曰實
寢寔昏終得保存後封華山公入為內都大官卒子祖
念襲爵祖念弟雲字羅漢頗有風尚位南兗州刺史坐
受所部荆山戍主杜虔財又取官絹因染遂有割易為
御史糾劾會赦免卒官贈豫州刺史謚文昭子昕晞皓
列在齊史

封懿字處德渤海蓱人也曾祖釋晉東夷校尉父放慕

容暉吏部尚書兄孚慕容超太尉懿有才器能屬文與
孚雖器行有長短而名位畧齊仕慕容寶位中書令戶
部尚書寶敗歸魏除給事黃門侍郎都坐大官封章安
子道武引見問以慕容舊事懿應對疎慢廢黜還家明
元初復徵拜都坐大官進爵為侯卒官懿撰燕書頗行
於世子元之坐與司馬國璠溫楷等謀亂伏誅臨刑明
元謂曰終不令汝絕種也將宥汝一子元之以弟虔之
子磨奴字君明早孤乞全其性命乃殺元之四子赦磨

奴刑為宦人崔浩之誅也太武謂磨奴曰汝本應全所以致刑者由浩也後為中曹監使張掖賜爵富城子卒於懷州刺史贈勃海公謚曰定以族子回為後回字叔念孝文賜名焉慕容暉太尉奕之後也父鑒初磨奴既以回為後請於獻文贈鑒寧遠將軍滄水太守回襲磨奴爵富城子宣武時累遷安州刺史安州山民愿朴父子賓旅同寢一室回下車勒令別處其俗遂改明帝時為瀛州刺史時大乘寇亂之後加以水潦表求賑恤免

其兵調州內賴之歷度支都官二尚書冀州大中正榮
陽鄭雲詣事長秋卿劉騰貨紫纈四百匹得為安州刺
史除書旦出晚往詣回坐未定問回安州興生何事為
便回曰卿荷國寵靈位至方伯不能拔園葵去織婦宜
思方畧以濟百姓如何見造問興生乎封回不為商賈
何以相示雲慙失色轉七兵尚書領御史中尉勅奏尚
書右僕射元欽與從兄麗妻陸氏姦通時人稱之後為
殿中尚書右光祿大夫莊帝初遇害河陰贈司空謚曰

孝宣長子隆之列在齊史鑒長子琳字彥寶位中書侍郎與侍中南平王馮誕等議定律令有識者稱之厯位太尉長史司宗下大夫南夏青二州刺史光祿大夫琳弟子肅列在文苑傳中懿從兄子愷字思悌奕之孫也父勸慕容垂侍中太常卿愷位給事黃門侍郎散騎常侍入代都名出懿子元之之右俱坐司馬氏事死愷妻盧元女也愷子伯達棄母及妻李氏南奔河表改婚房氏獻文末伯達子休傑內入祖母盧猶存垂百歲矣而

李已死休傑位冀州咸陽王府諮議參軍回族叔軌字廣度好學通覽經傳與光祿大夫武邑孫惠蔚同志友善惠蔚每推軌曰封生之於經義吾所弗如者多矣頗自修潔儀容甚偉或曰學士不事修飾此賢何為如此軌聞笑曰君子整其衣冠尊其瞻視何必蓬頭垢面而後為賢言者慙退以兼員外散騎常侍銜命高麗高麗王雲恃其偏遠稱疾不親受詔軌正色誥之喻以大義雲乃北面受旨使還轉考功郎中除本郡中正渤海

太守崔休入為吏部郎中以兄考事干軌軌曰法者天下之事不可以舊君故虧之也休歎其守正軌在臺中稱為儒雅除國子博士假通直散騎常侍慰勞汾州山胡司空清河王惲表修明堂辟雍詔百寮集議軌議曰周官匠人職云夏后氏世室商人重屋周人明堂五室九階四戶八牕鄭玄曰或舉宗廟或舉王寢或舉明堂互文以見同制然則三代明堂其制一也案周與夏殷損益不同至於明堂因而弗革明五室之義得天數矣

是以鄭玄又曰五室者象五行也然則九階者法九土
四戶者達四時八牖者通八風誠不易之大範有國之
恒式若其上圓下方以則天地通水環宮以飾觀者茅
蓋白盛為之質飾赤綴白綴為之戶牖皆典籍所載制
度之明義也秦焚滅五典變更先聖不依舊憲故呂氏
月令見九室之義大戴之禮著十二堂之文漢承秦法
亦未能改東西二京俱為九室是以黃圖白虎通蔡邕
應劭等咸稱九室以象九州十二堂以象十二辰夫室

以祭天堂以布政依行而祭故室不過五依時布政故
堂不過四州之與辰非所可法九與十二厥用安在今
聖朝欲尊道趨人備禮化物宜則五室以為永制至如
廟學之嫌臺沼之雜袁準之徒已論正矣後卒於廷尉
少卿贈濟州刺史初軌深為郭祚所知祚常謂子景尚
曰封軌高綽二人並幹國之才必應遠至吾平生不妄
進舉而每薦此二人非直為國進賢亦為汝等之津梁
其見重如此軌既以方直自業高綽亦以風槩立名高

肇拜司徒綽送迎往來軌竟不詣綽顧不見軌乃遽歸
曰吾一生自謂無愆規矩今日舉措不如封生遠矣軌
以務德慎言修身之本姦回讒佞世之巨害乃為務德
慎言遠佞防姦四戒文多不載長子偉伯字君良博學
有才思弱冠除太學博士每朝廷大議偉伯參焉雅為
太保崔光僕射游肇所知賞太尉清河王懌辟參軍事
懌親為孝經解詁命偉伯為難例九條皆發起隱漏偉
伯又討論禮傳詩易疑事數十條儒者咸稱之時朝廷

將經始明堂廣集儒學議其制度九五之論久而不定
偉伯乃搜檢經緯上明堂圖說六卷又撰封氏本錄六
卷正光末尚書僕射蕭寶夤為關西行臺引為行臺郎
及寶夤為逆偉伯與南平王冏潛結關中豪右韋子粲
等謀舉義兵事發見殺永安中贈瀛州刺史聽一子出
身無子轉授弟翼

通志卷一百四十六



總校官庶吉士臣侍 朝

校對官編修臣楊壽楠

謄錄監生臣楊以泓